


海莊逸稿

特 259

668



始





特 259  
668

259



河内清吉氏藏

王<sup>①</sup> 新物夕能者玉<sup>②</sup> 澤威末<sup>③</sup> 佛<sup>④</sup> 阿<sup>⑤</sup> 堆<sup>⑥</sup> 量<sup>⑦</sup>  
魯山<sup>⑧</sup> 家<sup>⑨</sup> 必<sup>⑩</sup> 降<sup>⑪</sup> 一<sup>⑫</sup> 門<sup>⑬</sup> 志<sup>⑭</sup> 事<sup>⑮</sup> 向<sup>⑯</sup> 東<sup>⑰</sup> 開<sup>⑱</sup>  
甲戌冬月 相恩 於<sup>⑲</sup> 于<sup>⑳</sup> 卷<sup>㉑</sup> 三<sup>㉒</sup> 海<sup>㉓</sup> 莊<sup>㉔</sup>



矢倉 隆氏 藏

身健作嘆意願而氣一氣充而何之子  
身身健康 又許矣吉也

一海恩 萬年首二

宣子

仍書遠六乃重言早音朝衣入縣竹道我  
身身身身身身身身身身身身身身身身身身

一海恩 萬年首二

宣子



海莊先生傳。

海莊菊池先生。名保定。字士固。稱孫輔。溪琴海莊生石。皆爲別號。紀伊在田郡  
栖原村人。其先出自肥後守菊池重朝。重朝曾孫武行。去隱紀伊。子孫相承。至  
孝友號淡齋先生。先生爲人。豪宕不羈。幼有異質。祖義同謂淡齋曰。予熟視  
此兒。非興家。則破家矣。未弱冠。從淡齋。賈於江戶。好與武夫劍客交。擊劍馳馬。  
不事家業。淡齋乃請大窪天民爲之師。使先生學詩。以抑邁往之氣。養溫厚之  
德。於是先生精慮深思。留意詩法。初學宋人。務主斬新。自謂稍足以示大方也。  
入京師。訪賴山陽。山陽未終卷。罵曰。聲律之學。非賈豎所及也。先生赧然而退。  
遂與仁科白谷梁川星巖等遊。研究數年。再出示山陽。山陽反覆熟讀曰。非復  
吳下阿蒙矣。天民亦曰。昔者子爲吾門人。今則吾翻爲弟子耳。無幾遊四方。與  
名儒松崎懺堂摩嶋松南齋藤拙堂太田晴軒梅辻春樵佐久間象山羽倉簡  
堂廣瀨淡窓旭莊野田笛浦大槻磐溪締交。詩益工。變宋爲三唐。爲漢魏六朝。  
古奧深遠。高華道逸。及其刻海莊集。清人皆評之曰。東方王新城也。然先生之



志固非以小枝自畫者矣。蓋以南朝忠義之裔。抱勤王大志。欲乘機察勢以成之。時幕府政衰。海內多故。先生慨然。上書藩主紀伊侯。論外寇利害。藩主嘉之。命爲有田日高二郡文武總裁。先生乃與邑宰議。募二郡壯丁三千餘人。大造刀槍銃礮等器。藩庫空乏。時不給費。先生自辦之。器械整備。而家產殆盡。頃之幕府與外國締盟。藩命解散郡兵。先生去遊京師。與志士往來。陰謀興復。明治中興。車駕幸浪華。先生使人上書。痛論時務者三。十二月刑法總裁大原重德承旨召先生。先生馳入京師。面陳政事得失。重德攬淚曰。人皆趨勢利。其言出至誠者。獨有先生耳。二年藩命爲有田郡民政局副知事。興學勸農。治績漸著。以事罷。五年教部省徵爲官。先生以病辭不就。七年內旨賜敕曰。勤王效忠。積年有勞。因賜菊花章銀鍾及金幣。特列士族。故藩主賜以二印。曰萬古清風。曰乾坤正氣。可謂能得先生之志者也。十二年携兒孫。至東京。諸勳閥巨公。聞其名。爭延見之。三條公實美岩倉公具視。特召賜座。問以時務。先生遜辭不敢答。獻以詩。中有云。春前人競鶯花色。雪後誰持松柏心。遂不出。越三年正月。歿於

淺草寓居。時年八十有三。先生所著無慮二十餘種。六百四十餘卷。其溪琴山房集海莊集最行於世。云。先生容貌溫藉。辭氣謙遜。不肯妄與人言。然事有不可。毅然爭之。不少假借也。其作詩慘澹經營。不苟一字。嘗謂心主靜。體主動。其發於氣節文章者。蓋本於此。孫武貞號晚香。學兼漢洋與余善。

百川曰。余十八九歲時。得海莊集讀之。未知其妙。蓋當時詩家宗宋元。槩斥唐明爲陳腐。學者風靡。余亦爲所化也。近時人始厭其淺露。三唐大家。弘正四傑。次第著於世。嗟夫。先生之見可謂高且遠矣。先生壯年好聲技。嘗遊浪華。喜妓綾卿嬖之。遂償其身價。納爲側室。綾卿有奇氣。素善歌舞。至是卸花鈿。退粉黛。淡粧素服。日侍筆墨。每先生與賓客讌飲。辨飯餐。點茗香。莫不順承其意焉。然先生有過。犯顏言之。嘗聞宗家欲鬻宅償債。謂先生曰。吾家爲三百年巨室。一朝鬻之。不知何顏見祖宗於地下。盍詣郡止之。先生大喜從之。事遂得止。嗚呼。先生憂國之志。遂使婦女子救宗家之難。亦其所陶冶也歟。



海莊菊池先生遺稿

紀伊 學業 貴志 康親 謹編

五古 (貳十貳題壹百貳首)

感遇

景慕神聖跡。巍巍何宏恢。山河萬里國。君臣自天開。五倫固嚴正。文武且多才。  
 聖訓貴儉德。宮室重樸材。日出至尊居。不聽築瑤臺。弓劍由來遠。威稜戒奸回。  
 韓人多歸化。蝦夷懾疾雷。中世紀綱弛。治道日漸隳。封豕乘時起。鞭地掠民財。  
 一夫不得耕。四郊多荒岐。陪臣執國命。尸位視三台。莫是神人怒。天地降異災。  
 咄哉蒙古氏。舳艫蔽海來。不顧腥羶徒。饑涎望蓬萊。龍王奉其職。十萬怒濤摧。  
 至今肥筑海。島嶼白骨堆。風淒月暗夜。啾啾鬼哭哀。虜酋無遠圖。燼滅唯寒灰。  
 不似牛皮大。千歲貽禍胎。

封建群侯伯。肅肅仰聖皇。神州天東緯。掌上展大綱。山河多佳氣。城闕萬朝陽。



草莽無遺賢。廟堂會鳳凰。至治常講武。練兵開教場。矢石雷霆烈。槍劍凜如霜。百萬虎豹士。心期俠骨香。羣蠻翅胡元。鉞路破天荒。古今幾變滅。寰宇足桑滄。廟謨無異算。推誠置人腸。紛紛鈴韜子。須察短與長。雄烈北條氏。功罪可相償。不比金閭公。失節臣殊方。千秋青史炳。嗟相摸太郎。

朝上海嶠望。渺茫沒涯端。積水一萬里。長吁發浩歎。蠻舶時出沒。鯨鯢噴橫澗。火器何慘烈。石榴子母彈。窄袖左衽徒。來要列衣冠。紫詔下天闕。言路策治安。千歲仁壽民。飽暖愧素餐。眇矣報國志。思之摧心肝。蛙鳴又鳥語。目今皆爲官。寄語當路士。松柏在歲寒。請看豐太閣。問罪征三韓。平安古道側。五層見石丸。當時八道馘。巍然傳京觀。

海塵不可掃。雲帆任出沒。赫赫神聖邦。誰忍污羗羯。壯士不徒老。自負嶸嶸骨。心期報國名。千秋豈淪汨。趙宋二蘇策。讀之更激發。廣寒闕清輝。蝦蟇棲月窟。嫦娥貪專寵。陰氣現彗孛。功業何日期。苦思催白髮。春雁獨多情。畫空或咄咄。休矣復何爲。脫然擲袍笏。始識天地濶。春風長薇蕨。

唐虞跡已遠。山河萬里青。世移琴絃絕。何處覓典型。夔龍與稷契。去鴻入冥冥。爾來幾千歲。萬邦仰清寧。天地有厄運。胡虜煽羶腥。雄劍沈無氣。黃金獨有靈。請看晉君臣。冠裳泣新亭。不及三閩君。澤畔吟獨醒。其地生芝蘭。遺芳至今馨。僊人赤松子。避穀餐流霞。置身雲漢上。反顧瞰山河。堪笑人間世。營營憂患多。紛紛袍笏者。謀猷亦不嘉。弟子張子房。一擊驚副車。竟爲帝王師。帷幕故調和。蕭曹何足道。韓彭或豕蛇。高舉冷然善。功就不成家。

目不見異物。耳不聞異聲。溪山萬古色。居民萬古情。桑麻春晝靜。村村午雞鳴。垂柳依塘暗。李花隔水明。雨過土膏潤。稚子餉春耕。奇服非所求。異類莫橫行。悠悠仁壽域。列聖所開成。爲問誰氏筆。著意描太平。

悲夫子嬰氏。無力制權臣。豈管馬與鹿。不能保一身。老奸趙高徒。詐術沒不臻。飽貪官與爵。自期亡其身。照鏡情惓惓。抽髮賜玉入。歌詞何衰颯。梅花莫忘春。苦計欲入宋。誰復問水濱。船成不可用。偃偃奈迷津。

七世生人間。勤王殲賊休。丹血注遺孤。一家當大讐。偉哉百代後。獨推楠河州。



北望湊川水。悠悠晝夜流。荒烟落日色。遠懸千古愁。冥冥鴻鵠影。一去何處求。  
吁嗟楠河州。芳草埋隱憂。

一劍五百年。鏘溢匣底藏。尺龍潛不躍。何用試魚腸。今朝始拂拭。星文河漢長。  
昔聞至寶氣。能射斗牛傍。逡巡虎豹走。魑魅避寒芒。上鑄正平歲。下鑄臣武光。  
數字隱然在。恩賜仰英皇。吁嗟祖宗靈。赫赫照虛堂。微賤誰能顧。葵心向太陽。  
草莽慷慨志。所期唯勤王。神州若有事。把以守一方。

讀詩十三首。示廣旭莊。

名士詠烈士。正見冰加雪。邈矣千秋下。一吟肝肺潔。俗儒頌俳優。譬之糞和泥。  
披閱恐汚我。命童投山溪。  
家住萬山中。山氣養其骨。朝帷石上雲。夜坐梅花月。吾讀斯翁詩。如食紅鬣魚。  
平淡存至味。此味出何書。  
采風觀西陲。耕漁皆野俗。夕投里正家。燃松代華燭。杯盃有古樣。拜跪慎獻酬。  
不知古君子。帶斯村氣不。

已非黃封醇。又無丹釀烈。酸醜不堪飲。入唇灰刺舌。瓢也汝空在。何日提春風。

東郊草猶短。望迷寒雨中。

東林有孱鳩。西林有健鳩。鴝也憐鳩愚。不肯施擊伐。容他呼雨啼。又任逐婦飛。  
莫忘鴝之義。寒曉眠霜暉。

烟波茫無際。沿海千山綠。神姦不可究。鼉鼉吹朝旭。維嶽降若人。萬象現毫端。  
藻思何超邁。已逼韓蘇壇。

詩中有羅漢。苦學求成佛。未知天籟和。比喻事詠物。枯草蟲自咽。涸池魚相濡。  
徒習四句偈。難現丈六軀。

五步移異木。十步置怪石。奇觀出人工。譬入王公宅。宅中主人公。庸俗難得仙。  
破毀那園池。羽化可昇天。

詩者文之精。筆要婉而卓。顏唐或疎空。可惜未磨璞。一出以示人。豈無燕石譏。  
世少知真色。西子亦論衣。

金華翠萬丈。上懸東海日。烟霞結成花。映發醉仙筆。醉仙髮如漆。未能脫塵緣。



一得駕天籟。步虛聲冷然。

月瀨香萬斛。稱爲梅花國。淑人遊其中。起臥冰雪側。矚目無非雲。飲膳盡珠璣。奇芳不自知。馥郁染羽衣。

瓶花少生意。池魚乏活潑。老漢野孤禪。何物傳衣鉢。早受新城毒。斷句主風神。假糝鏡中影。夢幻不成春。

曾讀竹枝詞。滿耳擘絲肉。冶情如可掬。蝶衣戀剩馥。潰爛少年腸。醜毒入骨深。宮商巧挑撥。不免長卿琴。

記夢。

大塊九萬里。積水遠蒼蒼。裡有一仙山。不許施帆檣。天開地闢後。熙熙受朝陽。仙人笑我前。玉女揖我傍。花白幽澗水。掬飲如瓊漿。四時無寒暑。人物皆壽康。令我摘靈草。終年有餘芳。翠羽呼夢醒。梅月照書牀。髣髴真邪夢。猶覺衣端香。

冬夜不寐。書上玉城大夫。

朝聞缺舌語。夕誦蟹行文。從事豈容易。漠乎如捉雲。望洋難寸步。重譯要奇勳。

常才非冶長。安得解鳥言。慧愚雖有等。業成正在勤。至誠奉職事。精一謝紛紛。世多耳食徒。途說誇異聞。此輩何足數。迷心混蕪薰。

南紀水爲國。斗出溟海間。熊野最懸絕。鰐波開鯨瀾。彼昔秦政時。呼作蓬萊山。弱水不可船。杳渺難躋攀。爾來二千歲。始聞有西蠻。其人多機智。拓地逞淫姦。大艦如鵬翼。緯度究九寰。萬里雲濤連。安得置嚴關。昔人恃險處。今視如轉環。杞憂夜更永。懷之夢不閑。

戊申春日。使柏木淡水入象山塾。

天砲諸煩囂。此器出洋夷。言語雖缺舌。嚴明見令辭。吾觀其演習。節制有成規。况乃象山氏。儒術人所知。翻然投筆硯。慷慨賦遠思。短兵本我長。勝算在應時。請見古陣勢。今日已覺非。韜略要善變。再緝孫子篇。器貴於創新。道豈悔昔賢。買玉則還櫬。獲魚可忘筌。從事君勉哉。願安海南天。

余在江戶三年。塵事倥傯。今夏歸省。與冷雲師。唱和於青山綠

水間。以柳州道人庭宇靜苔色。連深竹爲韻。



八  
高僧古淨廬。竭來茲學道。金書翻具葉。深奧襟黃老。初如金在沙。九練見至寶。或如達玄泉。滾然洗煩惱。世事適與莫。何爲介懷抱。行藏天所賦。瓦全臥莽草。容與至耆耆。好伴採芝皓。茫茫八紘外。曷羨安期棗。

豈管忘年友。敬畏比古人。豈管文字交。情如父子親。豈管風月侶。於我爲德隣。平生諷規語。一一可書紳。愛君白雲僧。義烈出天真。往年遊學林。花雨雨洛濱。迷海指津梁。欲繼釋子仁。當其排邪說。雄辨雷霆伸。歸來留杖錫。儒書究精純。一菴秋燈碧。松竹稱隱倫。虛懷無物忤。眼界日夜新。江村伴我老。微雨話垂綸。梧桐晝陰碧。細字寫黃庭。雨氣潤端硯。黑色芝蘭馨。夜吟久不睡。幽竹孤檠青。吟聲如琅玉。風霜正發硯。道人冰雪顏。自鍾山嶽靈。古松三十圍。借地起小亭。亭中無長物。方丈取典型。襟懷何濶遠。萬里開滄溟。試倚南軒坐。天風送龍腥。軒窓雖云小。虛明容寰宇。清吟坐微風。小酌聽細雨。偶繙時輩文。體裁工摸古。庖丁非不利。全牛奈旣腐。擲卷要一睡。烟霞夢天姥。上有仙人住。朝飢餐石乳。高揖向我言。來汝脫塵土。叩巖讀真籙。科斗字皆舞。譬如有虞琴。恍惚湘娥鼓。

靈氣如大藥。爲我換肺腑。餘聲震萬壑。懾伏澗中虎。仙境不可留。雲驂還南浦。夢耶猶未醒。相顧採芳杜。

竹瘦而石峻。太稱靜者靜。雖無鸞鶴迎。亦非車馬境。睡起再呼茗。雞棲清晝永。風簾留雨香。柴扉關花影。宿草侵藥欄。暗泉入沙井。退居身無責。道伴撫烟景。茫茫黃龍島。猶喜無邊警。擾擾城中人。豈無發深省。

林徑荒不掃。雨花長綠苔。病起瘦如鶴。寂寞臥蒿萊。家已無公事。何事望滄臺。先生快不樂。悒鬱誰得開。翹生久絕交。孤負白銀杯。五月海鄉飢。嗟我壯志摧。雖非治長聰。又知烏聲哀。

清流爽人意。好雨助花色。月輝倍劍華。霜威強弓力。不問情有無。物各有相得。况乃君與我。吟壇同胸臆。厭棄脂粉體。詩詞謝雕飾。古淡而奇峭。欣慕韋柳域。排慕韓公愈。機鋒蘇子軾。李杜何待論。運移垂天翼。偉績誰得爭。千秋領詩國。蟬笙蚓笛字。堆梁滿紙連。剪綵事鏤刻。此輩眼如烟。六如又五山。流毒既有年。中間二三子。稍窺韓杜篇。粗豪襟村氣。何日能忘筌。文政天保際。世貴新城禪。



消神徹骨瘦。患瘵豈日妍。病花誰返魂。神手有靈泉。高人鉢孟中。亭亭現玉蓮。  
青山人境遠。萬竹一亭深。衆籟寂無聲。月輝流鳴琴。千歲洋義事。一聽足知音。  
高人應未眠。疎磬出石林。

一叢楚臣蘭。數竿王氏竹。盆栽周生蓮。野生陶老菊。四清與吾友。古香盈茅屋。  
添以雲山僧。歲寒交愈熟。襟宇堪開豁。曷用訟幽獨。二頃足奉親。有兒皆嘉淑。  
偶把青史繙。先烈聞剩馥。登高顧鎮西。際天海水錄。阿蘇不入眸。倦倦勞遠目。  
老矣無勝具。何時拜嶽麓。

家梅軒翁。招飲於大梅花下。分月明林下美人來爲韻。得下。與

子顯宜民善淵賦。

暗香不可掬。疎影倩誰寫。孤山鶴去後。寥寥人如癡。邈矣青邱子。妙語神無痕。  
只有清夜夢。素服來林下。

送義藏之熊野。

蓮峯七十二。大瀑落其間。終年日月暗。雷雨捲天壇。是吾曾遊處。題詩在石顏。

寂寞荒山裡。十年無人看。君今掃石立。蒼然苔色寒。

吳棕亭見訪。分海內存知己天涯。如此隣爲韻。得海隣。

自憐蒲柳質。已與漁樵媿。世途多蹉跎。傲骨徒磊砢。門冷鶴常飢。家貧劍獨在。  
今朝有友來。亦宜青眼待。苦吟共推敲。喜氣見神彩。樂哉切磋功。悠悠期千載。  
身同老鶴瘦。家與梅花隣。綠水環柴門。遠隔城中塵。嗟吾十世祖。荷耜此避秦。  
洞口烟霞罩。悠悠度幾春。朱陳事漁樵。守拙養天真。久在南山裡。自稱南朝民。  
幸有秋園橘。聊安黃髮親。

墨水舟中。送野田子明歸山陰。庚戌三月十日。

半歲在城中。風塵來相侵。羈情何以慰。倦鳥憶故林。吾友田夫子。片語重於金。  
君袖明月至。流輝滿我琴。我琴本無絃。舉世少知音。巴歛得高顧。如燃靈犀臨。  
肝膽吾豈藏。吐露呈寸心。洋夷方猖獗。貔貅守海灣。咫尺雲濤惡。杞憂交懷襟。  
墨水今送君。花落夜潮深。微雨孤篷底。把酒論古今。不知空江曙。江月澹欲沈。

遠客。



今朝有遠客。對吾言語親。縷縷十年事。說來情何真。淹留遊京城。看盡繁華春。繁華雖云好。十丈奈紅塵。故抱濟勝具。遠向三山臻。奚囊行李句。斯心非避秦。一瓢隨處賒。桃源欲問津。醉鄉天地在。同是洞中民。

仁義村觀梅。

源頭梅花白。春山水皆香。汲流潤枯筆。題詩蒼石傍。朗吟梅花句。齒牙留餘芳。洗杯俯白石。煮茶汲清泉。城中人豈少。奈此風雪天。與梅爲友者。只有兩三仙。歸樵揖我去。爲指梅花村。脩竹半帶石。小橋斜通門。林下有茅屋。悠然共匏樽。衝雪投山家。童子立誰何。先生無他需。懇懇借一簑。梅花不知處。滿澗暗香多。空山春夜月。靜坐半牕開。樵家酒正熟。對酌傾幾杯。天真誰道破。明朝抱琴來。

六月十六夜。與平山長州。遊明光浦。

城南三四里。乘流棹暮江。幸有同襟友。對酒共漁缸。不問城中事。風露滿船窓。舟子和烟謳。滄浪之水清。孤篷半瓢酒。聊以慰平生。對此千古月。復知千古情。青蓮李太白。醉捉波間月。神機不可攀。金鯨遠出沒。當時人已道。君自有仙骨。

鶴鳴明浦靜。滄洲路將近。仙氣上衣端。清涼解幽憤。好携兒孫去。泛宅爲漁隱。汪洋八千頃。宜此曠世人。凡常秋蟲語。蕭索失天真。詞源杳難辨。一舟纔問津。

擬古。

仰天不見星。滿地皆荆棘。豺狼橫我前。磨牙道途側。魂悸寸步難。四顧夜闌黑。比年穀不登。鄉閭數粒食。今春又淫雨。鶯花無喜色。欲言不能言。吞聲淚沾臆。西虜方桀傲。萬里逞海航。廟議何所策。柔遠近豺狼。周召今不在。吁嗟奈成王。星辰旋不息。河海日夜流。邈矣神聖跡。鳳鸞去不留。登覽西風淚。萬里暮雲愁。憂苦人間世。將相非我儔。默算百年事。素心何日酬。高揖王子喬。結佩返瀛洲。

我家有甘泉行。己未十二月。

我家有甘泉。泉源自天開。梧桐生其側。鳳鳥時或來。千年汲不盡。甘冽如玉醅。隣奸羨其福。百方欺小僮。奇利欲共分。驕嚇或巧言。奸謀無不至。鑿井近我園。桔槔逞汲引。地底奪泉源。園草皆立死。久旱毒如焚。隣奸大詭道。譬之用三軍。水之歸隣竇。漸漸日夜遷。上智人不覺。主客倒利權。懷哉孫吳篇。未戰屈人財。



慨嘆井中魚。喚喝乞一杯。

北山。

幸爲太平民。邦國有恩光。生住祖宗宅。死埋祖宗傍。累累長松下。抔土雜彭殤。吾來秋風裡。短髮自悲涼。提攜妻與女。拜跪薦馨香。青苔滿兆域。餘見夜來霜。疎竹呈晚節。殘菊送遺芳。肥山靈未盡。依微空翠長。一支猶可續。寂寞君莫傷。

(謁先塋)

日色長慘澹。寒松蓋墓門。陰蟲晝猶咽。荒徑枯葉繁。林雨莓苔暗。每見愁雲屯。君此葬俠骨。一碣姓名存。竹露彈幽淚。梅花寄羈魂。何人蘋蘩意。野草插瓦罇。追慕久不已。見君師道敦。夜談緇虎韜。朝講接白猿。吾兒雖孱劣。升堂究流源。有文者有武。十五受至言。二十忽搖落。霜威摧蘭蓀。竟埋要離側。願全煦濡恩。

嗚呼秋風客。尋師入九原。

(展劍客會田七郎墓)

老田神槍手。垂綸琵琶湖濱。少田東海客。倚劍謝風塵。前後來投我。情如兄弟親。山園摘霜橘。不厭南阮貧。老田嘉儒術。至性見天真。少田許劍俠。精微捉谷神。

自欣鱗介叢。得此秀偉人。如何道未行。捐我歸蒼旻。空埋千金骨。寒雨澆荆榛。墓樹梅花在。清香自相隣。要離伯鸞事。千載憶等倫。

(展槍師野田正吉墓)

插花箴。

莫插紅牡丹。牡丹艷無香。容華豈能久。一歇徒悲傷。  
莫插楊柳枝。楊柳無勁節。不見章臺傍。遊人任攀折。  
莫插天桃花。天桃色如醉。冶態不爲仙。春風徒柔媚。  
莫插紅芍藥。芍藥自易萎。雨打風碎後。芳魂誰得醫。  
莫插燕子花。燕子銜青紫。青紫豈不好。恐類優孟子。  
請插蘭與蕙。蘭蕙令人雋。千秋香不罄。光華見玉潤。  
請插梅與竹。梅竹令人潔。處士風流遠。湘君有餘烈。  
請插蓮與桂。蓮桂令人幽。天仙尙氣韻。君子德馨流。  
黃花是我姓。隱逸是我情。古韵耐爲友。寒香散晚晴。  
細閱造物理。一花現一天。家園芳菊下。孤清有水仙。



介石喬松靈芝小幅。應某囑。

有松德不孤。有芝生其隣。高山何處是。悠悠幾千春。

無題。

俗士譚海警。衆訟不堪喧。十年寰宇事。瞭然掌上存。  
莫道風塵事。風塵令人老。孫武十三篇。要在知機早。

庚申秋冬米貴。

三秋海氣惡。一月江村飢。破篷信宿艇。茶烟細於絲。  
秋江天易暮。枯柳影蕭蕭。寒竈隔日炊。郎舟一葦遙。  
朝臥熊山陽。暮臥熊山陰。嘆息黃精草。雪深不可尋。  
城中多汗吏。鼎食醉緋裾。不見萬山底。終年耕白雲。  
山空橡栗少。年歎猿鶴飢。偶來城中宿。笙歌入雲飛。

劍客某來遊余門。經年辭去。乃賦以贈。

長短何足論。短亦有長時。圓心一字訣。可爲終身師。

寄語雙龍精。小警不可爭。湛然全其德。千古鎮神京。

芳山。

欲問荒陵路。隔谷揖芻蕘。爲是南朝士。猶帶正平刀。  
朝仰芳山立。水流世事非。山花雲耶雪。不向北風飛。  
南朝五十年。遺民說翠華。悠悠空山月。猶照御愛花。  
憶起延元年。慨然唯斷腸。夜深山鬼語。古廟月如霜。  
夜深如有物。人語半天聞。莫是忠魂來。朝于吾大君。  
芳山終古靜。芳水日夜流。不問壬申事。偏悲延元秋。  
七道豺狼滿。行宮半壁天。慷慨楠氏子。梓弓一篇傳。  
夜上藏王閣。清淚滴鮫珠。帝子今何在。山嶽空雄圖。  
有此山以來。陳跡夢幾場。堂堂大男子。獨有彥四郎。  
角仙邈難追。恐非赤松流。一庵西行跡。我期與汝遊。  
鐵中之錚錚。一擊千古鳴。碧血化春草。年年墓上生。



山上又山下。白雲十里開。帝陵一拜去。不爲櫻花來。  
 山鬼扶神好。風雲生虎翼。一論壬申事。山花無顏色。  
 延元御陵側。和淚掃落花。落花掃不盡。夜深感慨多。  
 夜讀芳山史。歷歷忠奸名。年年花如雪。千古芳山明。  
 寰宇戰塵絕。南北今一家。芳山櫻花色。結成日本霞。  
 山櫻色如雪。冷艷帶朝暉。山櫻心如鐵。不爲北風飛。  
 故宮萬山中。玉殿樵蘇處。如意廢寺傍。徘徊不能去。  
 烈士不可見。遺芳在山阿。懷古淚如雨。梓弓訣絕歌。  
 遠弔南朝跡。五百星霜遙。千山風雨至。夜半鬼神朝。  
 鶯花悲昔日。滿山風雨愁。落花入澗水。年年流不休。  
 正平恩賜劍。錦鞘一片冰。夜深人散後。拂雲拜帝陵。

七古 (十五題十六首)

珊瑚珠歎。

崑崙奴。西南夷。猩髮狗目鋪鐵皮。衆夷之中最蠢愚。裸身冒險不知危。排瀾踏  
 濤如行地。千尋撈出珊瑚枝。蠻酋得之爲奇貨。賣與他邦供戲嬉。荷蘭之船我  
 所通。年年載來崎港市。一函剪取赤城霞。枝枝似染桃花水。百金烟具勾欄優。  
 幾顆金釵狹斜妓。斯物往往媒冶情。難奈頰波赴驕侈。飢者食之何救飢。寶玩  
 由來徒艷美。病者飲之何醫病。未聞奇彩能起死。我願取珠再沈淵。長爲東方  
 養廉耻。君不見享保霸主初政日。服御猶帶木槌子。

越獅行。

碓氷嶺上越獅來。勢如風雨驅萬雷。八州豪傑不仰見。眼眩耳聾肝膽摧。咄何  
 爲者吉法師。皮履小兒亦奸回。十字鐵槍白龍舞。誓向湖城觀我武。莫以乃公  
 擬田四。麾下猛將盡貔虎。五畿戰士氣沮喪。百里聞聲皆栗股。嗚呼先軍三日  
 大星墜。還見螟蛉助霸主。竟收餘威就安撫。如今昌世三百年。猶令兵家取規  
 矩。草廬夢回春村靜。時聽門前過急鼓。

遊興國禪寺。其門揭關南第一禪林六字。是元僧一山所書。風



致可愛。因以關第爲韻。

謾道詩賦答清世。每把名山入品第。關南古寺弔南帝。御書遠記興國歲。黃菊翠楠主盟誓。要殲豺狼滅賊勢。天地否塞皇運閉。快劍利鏃徒精銳。版圖不復麟鳳逝。玉魚金盃和恨瘞。秋風尙有双淚涕。澗水鳴咽怨未霽。

興國賜號開士山。紅樹白雲擁林關。山人來仰白雲攀。鐘磬聲流白雲間。欲借禪榻謝塵寰。鴉啼猿悲夢不閑。半痕曉月如弓彎。猶照南朝舊屏顏。

戊申正月。飲于家梅軒翁宅老梅花下。

先生官清心如水。先生齡高鬚眉美。詩書宿好老愈篤。日永明窓憑淨几。侍坐團欒麒麟兒。俊爽齊見將門子。伯也文章出頭角。賦成應貴三都紙。仲也學畫坐槃礴。意匠遠追虎頭氏。叔也碧瞳好身手。曾藏韜略手武技。季年十五氣食牛。平原芳草調騷騶。一家景福已如斯。何數姬周有八士。老園梅花二百年。鐵幹屈強霜皮堅。年年春風不獨來。呼回芳魂雪滿天。瓊觴忽搖橫斜影。一隻脩鱗。潛在淵。先生酒酣朗然哦。驚起觴底玉龍眠。月落參橫夜寥寥。滿襟清氣寄

七絃。俗夢不用羨趙郎。隱跡何必問逋仙。却對梅花緝青史。祖宗累世多大賢。君不見延元天子蒙塵日。勤王忠義功第一。松柏凌寒誓不渝。崎嶇軍國守苦節。太似此樹崢嶸姿。香風千古傳餘烈。無限幽懷花無語。鏘然欲躍匣中鐵。吾亦一幹同根者。不妨在座賦香骨。

備後櫻谷笠井氏所藏鳩化石歌。

石橋山下朽木中。數聲呼去隱英雄。英雄一現朽木僵。乃見霸略有關東。憐君基業倚外舅。兵權竟落陪隸手。鶴岡祠前春寥寥。天陰巢濕猶呼婦。何似櫻谷滿園雲。一拳奇石海外聞。三枝睡足久不起。風香花暖到夕曛。

中川舟遊歌。示霞峯。

君不見簞食瓢飲會同儔。人間隨處是滄洲。好把世事付西流。不須百年學佻囚。舉杯屬君爲君謳。萬古茫茫似一漚。共在兩間寄蜉蝣。霞幙雲席當獻酬。天祿之外更何求。胡爲顰頰抱鬱愁。君不見麟經赫赫照千秋。當時鄰叟東家丘。又不見守宮三千滿玉樓。阿房一炬斃沐猴。吁嗟南面誇王侯。一瞑土下枯燭



體。安辨妍媸與恩讐。七十二冢逞奸謀。何異火坑與泥溝。此生有酒每入喉。傍  
觀蝸角鬪項劉。能令瓢也領青州。欲翻天地容孤舟。二客縞衣期再遊。斗杓月  
盤君醉不。

濱梧陵所饋刀水新鱖魚引。

我憶銚江度幾年。風塵未免世累纏。關左九月秋霖歇。新鴈嘶霜晴色堅。客窗  
埋首濕薪側。有如海青望北燕。昨夜吟燈呈喜色。蜻蜓眼張碧蟲聯。今朝果有  
同人饋。水臆雪鱗照席鮮。潑刺跳擲知出類。想見夜漁勞鉤拳。急急勅僮如律  
令。六枝健櫓破蒼烟。獲物獨貪愧賤夫。爲裁小簡招醉仙。割烹未了促舫船。飽  
嚼醉倒菊花前。一鼾睡去幽夢遠。霞湖銚江水拍天。

謝春星所畫山水妓衣行。庚戌十月。爲上總飯高東溟賦。

謝春星。謝長庚。生來家住攝東成。觀畫上國柔媚景。盡將風烟鍾碧晴。化蓄胸  
中五色汁。萬象皆從毫端生。寺障觀壁信手揮。水動山搖雲欲飛。老來餘豪猶  
未足。又灑醉墨上妓衣。春林雨過翠可掬。洞口桃花春浪微。春花秋月伴流水。

琴鶴消沈事已非。一領春衣見蟬蛻。殘香剩馥尙依稀。世間好事自不置。裁成  
懸幅比珠璣。上總雅客東溟翁。得畫索詩煩乃公。豈無此幅嫌雞肋。好以一言  
破世朦。譬之阿瞞敗跡經蘇仙之清遊。世人唯說山間明月江上清風。

渡邊華山所畫平原草廬圖行。爲家梅軒翁囑。

一卷橫披寫荒蕪。滿區蒿萊生坐隔。展觀未知誰氏宅。題曰平原草廬圖。茅堂  
揭曰韜畧書院。下見豪士撫虎鬚。苔壁何所有。長槍與彤孤。案頭堆卷定何書。  
不是孫子果陰符。側有一客雄且壯。如聞咄咄言吐麤。客是爲誰華山子。眼睛  
炯炯笑腐儒。此圖得非當日自描其真以爲後券乎。哀哉烈士世不容。短狐射  
影鬼揶揄。平原一轆軻。殘芻僅活汗血駒。坐老千里志。何物漫弄天地樞。二十  
年前人說夢。平原一任秋草枯。方今海警日騷然。世間飽養多羸驢。君家自有  
大梅樹。冰花鐵幹影相扶。公退喜接山澤隱。慷慨三酌倒玉壺。樹梢太白光爛  
爛。對君觀畫三長吁。

蓼洲老友所書玉川茶歌引。



吾友蓼洲子。五歲塗鴉人稱奇。髫年游戲總在茲。玩墨弄筆不知飢。十五始學九成碑。廟堂衣冠見端委。文房裘葛年既滋。正見魚龍躍硯池。歲在庚戌冬復月。爲吾書贈玉川詩。字祖晉唐加新意。玉筋金骨兼妍媚。右軍之室君將入。歐虞顏褚皆並轡。筆陣君建嫡統幟。宋元已降是叔季。忽有光絹輝陋居。爐畔拂塵幾卷舒。玉川子在清虛。有此詩來無此書。

遊伏羊山中。己未四月十三日。

欲將清景洗暗愁。且試伏羊一白遊。獨木橋斜入修竹。巖開澗豁復可舟。樵歌漁唱人世遠。吾儕始償平生願。山花無主影自閑。愧我十年塵垢面。捨舟走上白雲巔。下瞰那瀑第二泉。坐久酒酣吹鐵笛。龍吟驚破老蛟眠。

劍。

不願任俠手。卒然報恩讐。不願憤激士。突如斬奸頭。但願廟堂清明日。鎮爲君王護神州。

戲贈若林老人。

若林老。市井仙。滑稽玩世又玩天。軒義之術自延年。碧瞳熒髮如漆。來對山人說詩律。太古之音世稀聞。音吐轟然言飄逸。吁嗟吾輩之耳三日聾。吁嗟吾輩之耳三日聾。

謾言。

婦言聽。女謁成。古今何國不覆傾。苞苴如山海爲竭。冤魂怨鬼哭滿城。段鑑昭昭萬古明。婦言歇。女謁止。爲政之本歸廉耻。嘉謀正出謇諤士。苞苴絕兮士氣起。億兆仰見政教美。黃金白壁賤如泥。廟謨一新保赤子。君不見太初以來治亂機。千古明明照青史。此言迂拙君請聽。一片丹心注在紙。

家藏白琅玕歌。

白琅玕。白琅玕。其長尺五直如竿。以鐵擊之響鏘然。雪華入髓水柱寒。維吾祖先遊熊海。採之萬尋鯨鰐澗。子孫愛藏二百年。一函玉潤懷祖先。何比骨董充奇玩。追慕愈覺鑽仰堅。摩挲常置几案上。幾卷古書伴聖賢。吁嗟琅玕雖小其來久。令吾在祖之側考之前。



五律（參題四首）

呈玉城大夫。

秋從燈下生。霜向髮邊成。世事浮雲散。詩懷流水清。鐘歌高閣沸。星斗細舟明。不見塵埃動。松深老鶴鳴。

仲秋與霞峯謁外。訪秋甲山。贈以青邱集。是夜無月。甲山亦不在。彼此悵然。

欲同三五賞。回棹訪吟盟。孤笛秋聲遠。一帆暝色橫。園庭饒竹樹。湖海半陰晴。坐久君歸晚。已看漁火明。

遠認脩篁色。依依似舊春。柴扉猿鶴守。板屋釣漁隣。我袖青邱集。何尋白眼人。悵然吟興盡。桂影幾時新。

中川舟中。賦示蓼洲。

離城三四里。一舸弄秋晴。胸裡無冰炭。林中有弟兄。釣竿逃濁世。沙鳥托浮生。偶語蓼君在。不違文雅情。

七律（十四題貳十四首）

秋半。

飄蕭短髮奈愁何。烏兔匆忙轉轂過。淫雨連城望早稻。大潮八月惜殘荷。達官堂宇杯盤亂。仙客樓臺笑語多。世上紛紜不堪問。一瓢只合答青篲。

漢唐禮樂復何加。盛世風潮趁暴奢。侯伯儀從徒艷美。娼優衣帶亦豪華。遠洋飛雁警蠻舶。先哲危言造礮車。問客尙桃秋燭讀。五更蛩語透窓紗。

巨海茫茫物色疎。遠聞唯賴蟹行書。秋高岳雪連城闕。月冷雲濤接太虛。饕餐爭觀盤上肉。蠢愚莫擬釜中魚。滿朝將相如星宿。三顧何煩問草廬。

海上仙人何處尋。老來爲客臥江潭。天從雷後炎涼變。月中城頭雲雨深。冷巷孤兒矐似鶴。新秋早稻貴如金。候蟲猶有催閒筆。恰展芭蕉數寸心。

囂囂東舍又西隣。不及關門避世塵。講道先生多僞樸。銜時近釀豈真醇。家機短褐誰論價。官局薄泉殊有神。一棹扁舟江萬里。大星光老眼中人。

讀書正見古人情。好賸江東爲太平。守城何策期金石。防海所言皆弟兄。杭稻



連雲秋色遠。船帆載月夜潮明。世讓謔謔徒戰伐。九原誰復起山生。  
秋燈枯坐了殘篇。夜靜何堪百感牽。已見洋夷求貿易。或聞清國澆腥羶。太平  
泉貨名凌實。澆季人情交似烟。欲載釣竿乘曉霽。海城月落水連天。  
滿街輿馬世塵喧。玉帛朝趨將相門。衆議幾時歸確論。後生何意學蠻言。秋深  
不耐橫長笛。菊發猶能照小尊。白首疎狂天寵渥。閒窓醉臥負微暄。

家梅軒翁宅老梅花下。賦示子顯。

城外青山山外園。疎梅脩竹似江村。官清四世香埋骨。花護三冬雪滿門。正氣  
當年分老幹。遺芳今日及遙孫。與君對酒論心事。笑指孤高千古魂。

吳棕亭見訪。乃賦以示。

行樂賞春歌吹叢。當時意氣調尤同。南樓旨酒千觥綠。北郭嬌桃十里紅。詩興  
浪花釵影月。暮年禪榻髮絲風。相逢共笑才華盡。蘆荻洲中兩釣翁。

中川舟中。賦示濱梧陵柏淡水。

江風颯颯水烟晴。山色蒼蒼秋氣橫。野渡魚跳何問瑞。官橋鵲話已關情。千九

靈藥新雷霹。三尺龍泉古鐵精。話罷孤舟日方落。城西太白一星明。  
萬尺芙蓉鎮日東。八州沃野霸圖雄。周楚爭權名豈敵。吳越共舟憂亦同。烈士  
深諳天砲利。衰翁尙說火船工。何時神劍誅鯨鱓。妖血高吹海水紅。

端亭即事。示家三溪。

重倚旗亭借一窓。嗟來薄酒與何窮。樓寒宿鷺餘雙白。池涸秋蓮銷晚紅。枯柳  
殘霞吾亦似。西風蒼鶴汝將同。衰年快意三溪在。期見雄飛冲太空。

贈關杏村。

詞林零落衆芳萎。見汝天機雲錦詩。白露滿池蓮盡後。清風三徑菊開時。霜髭  
新得忘年友。蟲語猶歡一字師。湖海胸襟惟有酒。囂囂不用說洋夷。

書家三溪學士漢宮嬉春詩後。

麗語綺文翻斷腸。杞憂閑客唯悲傷。魚飛龍躍聳騷骨。鬼泣神愁在錦囊。行墨  
間猶揮血淚。朗吟時正見風霜。何人爲養能言鳥。使把斯章獻玉堂。

川崎途上。



縑素華鬢載渡河。群舟自見太平和。軟塵遊騎踏鞭影。沿道紅樓聞笑歌。聖世  
郵亭羽書少。君王鳧雁稻梁多。行松蒼鬱挾官道。裡有間人冷眼過。  
逐晴出郭問桑麻。潮退海沂多白沙。董稻滿田猶滯穗。枯梨隣屋見狂花。隱憂  
客子征衫薄。述職公侯車服華。惆悵江風催落木。小春雖好易昏鴉。

宿金川驛羽澤樓。

呼快撫欄望豁然。飄飄自許地行仙。小詩纔寄霎時適。斗酒難誇百首篇。晚日  
影明帆遠處。風烟秋老雁來邊。旗亭一醉朗吟去。菊後霜晴楓葉前。  
客亭無夢曉寒凝。却喜聲塵侵不能。詩氣逸如凌海鶴。鄉愁沈似在山僧。青年  
游子聘村妓。白首先生守旅燈。感極更揮腰劍視。寒光照膽潔於冰。

金川驛樓懷大槻士廣。

曾與親朋宿此樓。津頭花落月輝愁。重來潘鬢數莖雪。別後蘇詩幾度秋。都下  
才名推大筆。南中詩氣寄孤舟。燈前枯坐磨吟硯。欲爲當時償唱酬。

聞松平子秀擢隊長。有此寄。

仕途曷以偶然成。貴族自由千古名。光動旌旗新隊長。威加部伍舊軍盟。丹心  
固誓報邦國。儒術豈無酬太平。寄語南溟茫渺際。誰容戎狄問蓬瀛。

庚戌復月十二日。訪森本生賦贈。

警海何爲嘆望洋。地圖已擬過蠻嶠。古函靈劍誰知價。深井明珠自葆光。幾歲  
神交勞遠夢。一朝日擊話中腸。爲君試把離騷讀。湘水豈無流國香。

呈藤學士。

捲起濤瀾酒助談。爽然辭氣似風譚。或聞明議速神妬。多見忠臣老嶺南。道墓  
臥龍兼管樂。病追摩詰共雲龕。窓紗坐覺寒颼透。屋上霜林帶夕嵐。

淺草海苔。

舟輕如葉載釵裙。纖手輕篙趁曉曛。誰漉半灣芝浦月。剪成一片品川雲。三冬  
價比霜柑貴。千里名先蓴菜聞。堪向天台供仙客。玉爐灼得碧霞芬。

五絕（參題十壹首）

讀廣淡窓遠思樓詩鈔。



昔人摸唐明。今人做宋清。詩至無摸做。始識是正聲。  
君詩如潭水。深靜照百邪。波瀾湛不動。所以育龍蛇。  
嶮怪生子玉。雄偉成旭莊。詞源如巨海。波瀾不可量。  
山空無客跡。樹老少蟬聲。悠揚雲生處。雨過遠泉鳴。  
逗林殘月白。隔水曉山蒼。樵子歌未起。幽花散寒香。

和羽倉蓬翁秋日釣某園韻。

翠羽來何處。時棲蘆葦枝。魚子沈無影。魚飢鳥亦飢。

庚戌九月十三日。與松園杏村三溪霞峯。觀漁於中川。分韻得  
上聲。此遊一舟同襟。松園通蠻籍。杏村從軍旅。三溪耽經史。如  
余與霞生。則市井小隱。然亦各言其志。不在尋常閑適之例也。

漁利果如何。水風送耶許。樂在釣魚外。一篷雨中語。  
酒罷人不語。詩思坐篷底。縷縷輕烟起。厨船炊菰米。  
哀哉寄居蟲。不知殼之小。水天九萬里。上有圖南鳥。

青篔乘綸翁。閑却屠鯨手。世事不可問。只有一瓢酒。  
邂逅房總山。暮色翠慘澹。太白明如月。照吾斗大膽。

七絕 (參拾壹題壹百貳首)

論詩

謫仙仙去跡蒼茫。誰續長庚萬丈光。讀到黑雲翻墨句。大弔一發破天荒。

(蘇東坡)

長白山前風似刀。金遼社稷總悲號。詩毫不帶烟霞色。蒼鴉摩天秋氣高。

(元遺山)

胡兒天性射凝精。英氣熒熒鍾碧睛。秋獵手屠糜鹿肉。未遑揖讓上堂爭。

(劉青田)

鳳錦龍綃帝者衣。雲烟杳渺自然姿。青邱天授神來筆。壓殺朱明一代詩。

(高青邱)

眼冷詩濤似雪頰。空同秋色一峯開。雄吟試踏雲巔石。萬里悲風朔漠來。



(李獻吉)

陶謝韓蘇隔一關。千秋誰賦夕陽山。高才大復苦心跡。紅樹白雲相對閑。

(何景明)

雄文華句尚堪刪。明月白雲辭未安。道破自家身上事。峨眉雪色霧中看。

(李攀龍)

甄洞末通仙嶽霞。茂秦空夢舊都花。莫將七子漫相比。弁老雄深是大家。

(王世貞)

世運消磨舊典章。函關紫氣已荒涼。風揚田水月吹火。擬得當年李錦囊。

(徐文長)

紫氣黃金不抵錢。荒涼蘆葦帶秋烟。夜叉口角袁宏道。好事摸來白樂天。

(袁中郎)

花影禽聲日夕寒。清沙白石照蒼顏。還憐吳老無生氣。一片春風畫裡看。

(吳梅村)

渭城柳色馬蹄春。天籟寥寥豈在人。秋風秋雨王學士。聞香捉影夢難真。

(王漁洋)

露井天桃寫不成。橫江雲浪待誰行。詩情却自蘇公得。細雨梅花仙女城。

(王漁洋)

柔語屬來圓熟詞。恰君慧眼察天機。劔南詩陣密如網。五十六言誰解圍。

(查填行)

詩話如含宿昔響。淺膚何足辨千秋。翠蛾霜劔皆香粉。畢竟趙袁真老優。

(趙翼袁枚)

世間誰煽竹枝詞。芍藥薔薇春淚垂。雅頌不興王迹熄。幾家艷筆女郎詩。

(當今)

近古將士評。

北闕請來征討文。嘉猷千古仰高勳。江公斯志明如火。藝海孤燈破闇雲。  
一劔欲清東海天。長山先見起紅烟。軍門君復皇朝制。不許僧徒弄政權。



嚴刑峻罰百神哀。只見蕭牆釀鬼胎。君自少恩招反噬。禍機已伏燭體杯。  
 反旗東指捲狂瀾。古利爲灰戰骨寒。誰識葵心常向闕。不追鬼武抑王官。  
 微言咄咄在雲房。夜半歎聲出臥床。既使犬鷹怨抵骨。殺身何必一明郎。  
 骨肉軍師星斗胸。一門士氣服歡容。存宗道在斯公眼。早透玄雲認大龍。  
 狂烟報警達南圻。忽見孤鞍插號旂。洛下戰塵遮不得。蔚然凌海一龍飛。  
 頻頻數使乞和親。饒舌徒延上將曠。一世霸圖猿面鹿。還歸馬上放鷹人。  
 函左今非割據秋。太平丞相飫嘉猷。昏童不識天威在。翻道人奴是沐猴。  
 丞相眼中無八州。巨魁已屬檻車囚。驕警何異新亭泣。難避天家問罪尤。  
 聚樂豪華夢一場。終看哲婦覆金湯。祥鸞豈啄他巢卵。却笑寒鴛嚇鳳凰。  
 駐馬轅門乞將權。心知萬卒敵中懸。朔方太守家風在。不向孤軍張老拳。  
 秦然死地毀舟船。置酒圍爐風雪天。八萬驕兵空仰首。不容一矢及雲巔。  
 金湯自破石郎姦。危世人情疑悞間。莫賤英雄遲暮淚。沾來北道百重山。  
 英雄却失自家機。何憶風雲隨指揮。一局獵場人似鴈。真成京洛背花歸。

血薄盟書想履霜。廿年白玉死猶香。城中無數榛荆裡。獨見芝蘭抵骨芳。  
 好策神聰返玉京。守城何必問輸贏。平生俠骨報知己。半國博來千古名。  
 俠骨貫天通聖謨。陣雲卷地見雄圖。魚鹽馱去授讐敵。磊磊胸襟偉大夫。  
 莫言逐父爲蒼生。賊膽兵機老益精。正見雛狼來飽肉。血痕雪染海津城。  
 野戰攻城武已多。英雄末路竟如何。可憐功狗先升俎。花落風寒辭世歌。  
 豈惟韓婦喚遼來。慈眼曾從魯論開。七尺身材天將像。不描麟閣畫香臺。  
 殘軀至此復何爲。不恨風雲眼裡移。已分韓彭先就戮。區區誰惜獻城池。  
 千里東陬雲海深。每看巨傑養雄心。老龍獨眼君休怪。半扶靈睛點小禽。  
 鵬程風起捲西州。矯矯石曼吞上游。忽轉屠龍醢鳳手。纔收海島小琉球。  
 單騎辭親落敵圍。風雲際會最幾微。三年石室龍蛇厄。翻養雄飛他日機。  
 酒杯交結雄兵綯。吶喊一團侵萬盾。殺氣常凝跛足精。扶桑當日見孫臍。  
 何較榮枯背舊親。男兒死節是天真。雲鄉一語潔如雪。冷殺圍城五萬人。  
 不問敵船如鐵城。滿身膽氣壓明兵。方今防海徒勞議。安得斯儕有一名。



小游仙。戊申秋日。悼兒自遺。

一雙寒水湛明瞳。學劍爲仙騎白龍。袖裏青蛇光映發。秋天晴色玉芙蓉。  
秋星歷歷滿蒼穹。鵬背雄吟九萬風。身外瑠璃凝不動。玉鞭直指白蓮宮。  
送了秋時送了兒。碧蓮花落滿山池。斷腸何耐斷腸語。翻作遊仙數首詩。

九月廿日。由良港所見。

九老雨晴秋尚綠。雲帆沙鳥影相逐。蘆花洲畔一絲烟。又見漁翁燒楚竹。

江村詞。

挾岸蘆花似雪堆。半江曉色一帆開。青籃有物跳將逸。巨口前宵入網來。

書鴨東四時襟咏後。

香雨艷雲痕已空。柳灣月色獨溶溶。風流唯賸烟霞在。一任東山有臥容。  
綠思紅情人未闕。半生詩在粉華間。問君今日傷心處。花頂松蘿霜後山。  
雷雨東來山色新。六街夜氣斂芳塵。多情錦老春風筆。寫柳摸花付後人。

己酉三月書感。

空江惹雨片雲行。人道靈旌還玉京。百里蕭條寒食後。春村只聽午雞聲。

夜坐。

竹窻夜靜近三更。猶註孫吳眼益明。山雨欲來龍氣動。一池健鯉躍成聲。

羅浮園觀梅。示廣吉甫。

滿園朝雨洗纖塵。數朶香浮上番春。花若有知應一笑。來看海內兩詩人。  
携手城東十室村。暗香香裡共匏尊。明朝白鳥關南路。細雨梅花入夢魂。

八月十七夜。携霞峯淡水及兒順姪清。觀月于中洲。分二千里

外。故人心爲韻。得外人。賦寄冷雲師。

夜深江濶絕人籟。輾浪銀輪影方大。一舸同宗對舉觴。不知身跡寄天外。

一家行樂月爲賓。薄酒山肴叔姪親。玉露金風遙耐憶。孤燈丈室讀書人。

八月朔。與蓼洲。梧陵。霞峯。淡水。遊中川。兒精。豐姪。清。僮。篤。龜等

從焉。

處處雞聲水寺鐘。人家夾岸曉烟濃。長橋百尺橫秋影。淡碧溶溶浴老龍。



空江人語隔蓬聞。宿鷺眠鷗望未分。吞岸秋潮風正好。前帆已入總州雲。  
輪囷蒼蟹玉盈腸。潑刺銀鱸餉斫霜。爲是宰人呈海味。故山綠橘憶秋香。  
日落江村半掩扉。孤舟燈火出蓬微。津關若作誰何問。爲道張家釣罷歸。

送柏木淡水歸田城。

遊子業成吾所期。好分佩劍餞君歸。龍身銹澁請休笑。際會有時雷雨飛。  
旅人晉米自鄉至。

長亭短驛二旬晴。一笑一言千里情。最喜鄉園秋菊節。慈帷飲膳勝平生。

九月廿日。訪羽倉簡堂歸途。

寒雨蕭蕭送夜潮。孤舟閑客弄歸橈。水烟微漏漁篝影。照見蘆花出半梢。

歸舟所見。

燈影微微乘暗潮。空江耶許數聲驕。他船右去吾船左。慣手舟郎能轉橈。

庚戌十月。與家兄。遊浦賀港。宿于游神亭。

房山東去海雲開。數見洋帆鵬翼來。雞犬滿區仙吏叱。不令徐市識蓬萊。

峨艦乘雲萬里風。紺瞳常慣認溟濛。西會豈問長生藥。欲送芙烟醉大東。  
客舍依山曉色蒼。兩州一帶水爲鄉。應知南紀傳霜信。滿港風帆橘柚香。  
沿水千家封夜烟。客樓寒雨響蕭然。臥知洋船拔錨去。耶許聲嘩客枕邊。  
舟船碇泊小繁華。水際紅燈賣酒家。秋雨秋風搖落後。海雲深護一樓花。

深川夜歸。

小艇獨歸枯柳陰。淡雲籠月夜烟深。霜江人定無燈影。閑聽疎鐘落水心。

丁巳二月六日。仁義村觀梅。懷城中諸友。

吟盟來憩野人家。隔水春鐘日已斜。翠羽歸林君不至。半溪微雨濕梅花。  
十里春山日欲曛。梅花積雪白平分。痴情誰續趙郎夢。身化依微冷淡雪。  
疎林密樹帶清泉。春在先生短杖前。滿眼詩情着無地。梅花雪色鬪嬋娟。

春日偶成。

客散棋殘下草堂。一庭微雨落花香。柴門遠接藤蕪色。半入江雲半夕陽。  
遲日煙霞欲盡春。落花飛絮一傷神。閑愁更逐歸雲遠。江上青山似揖人。



田園數畝食猶餘。三百星霜松竹居。野客飽蒙清世澤。十年幾上袖中書。

展弟惟聰墓。己未三月廿六日。

四海何如骨肉親。此生一訣隔千春。碣前和淚招魂語。同是慈帷仰乳人。

有本君見訪。

吾是江南一漁叟。滿篷煙雨半瓢酒。自哂朝士認虛名。匹馬來嘶間外柳。

玉城大夫獵北山歌。

雪滿郊原狐兔驕。大夫出獵問芻蕘。優恩依例許參列。况有家臣半道邀。深憂虜艦近蓬萊。每向獵場觀武來。殺盡滿山狐兔血。段紅染葉一蹊堆。斑斑血濺白狐裘。打坐林叢相獻酬。壯士各誇功第一。生擒老鹿大如牛。

自稚府歸栖原舟中。

鳴門潮勢似奔瀧。短棹忽離枯柳椿。亦是風流楊鐵笛。一篷烟雨過松江。稚城今日倦遊歸。枯柳殘楓帶落暉。海路不孤歸思急。寒濤百里一帆飛。

送平野生。

七尺身材三備豪。秋風倚劍海天高。他年洋賊如窺我。莫背平生日本刀。

白衣大士圖。

嫣然一笑氣成春。不怪風容似婦人。色即是空空即色。無量壽福見天真。

己未十月。浪花客中。

鄉愁終夜亂如麻。霜月襯窓聞早鴉。憶起廿年歌舞夢。隣樓一曲蝶迷花。

桂宮。

金閣銀樓玉作林。碧瀾紅葉錦雲深。寄言園吏請休怪。吾是瑤池一水禽。

奉和景山老公芳韻。

海霧洋塵何日除。優柔廟議歲華徐。袖中長保出師表。唯恨無人顧草廬。

茶久亭示可水。

客舍遊鴻認昔蹤。劉郎老去暗愁濃。殘燈無焰曉衾冷。聞盡東山寺寺鐘。

文久記事。

誠忠天許亦人容。何物群宵議舊封。千歲公評青史在。儼然奉勅大先鋒。



鬼哭神悲天日冥。幾家香火祭英靈。少陵野客驚人語。昨夜東風吹血腥。  
 天涯存沒果如何。昨夜新鵲哭落花。人世風波山欲拆。神仙未必老烟霞。  
 勤王義士護皇京。揭得乾坤名分明。出沒無形誰主宰。斬奸神劍是天兵。  
 方見誠忠歸草間。逡巡府尹是何顏。猛然夜半高臺火。不許僧房留大奸。  
 南朝將士恨難伸。物換星移五百春。一片精誠磨未盡。方看刀鋸及泥人。  
 百五長程十二關。淹留軍馬解金鞍。世途辛苦君看取。進已無能退更難。  
 未開幕議戮天驕。一任洋雲萬里遙。關左健兒新窄袖。鐵鞭打過第三橋。  
 二八青蛾勸玉觴。何來豪客劍如霜。東風未斷腥塵氣。枉作太平行樂場。  
 風光歷歷總傷神。昨雨未乾今雨新。唯有櫻花非世事。嵐山獨作舊時春。

越前春嶽老公索詩。

海曲秋高水斂煙。巴歛歌起夕陽前。蘆花撩亂風吹去。飛上九重臺閣邊。

五古 (十五題貳拾九首)

己巳秋日。謁日前宮。

悠久神皇績。大東拓山川。爾來幾桑海。遺廟尙儼然。跪拜脩竹下。身帶萬古烟。  
 感激期馳驅。剪竹爲馬鞭。

達堂蒼龍館。用陳子昂懷古詩韵。

今皇新登極。東京天府都。山河歸真主。何物望霸圖。廟謨從周召。軍府說孫吳。  
 遙遙天潢水。萬世澤不枯。一視五大州。遠隣德不孤。寄語西溟使。行矣莫踟蹰。

感遇。

皇統萬世遠。天子是天神。禮樂古今改。衣冠制度新。億兆皆卒伍。海宇一君臣。  
 慚我文明際。素餐旦夕人。  
 寒宵繙國史。笑他誇項劉。神策開河海。聖謨判郡州。武威弓劍遠。文德衣冠優。  
 天家萬萬歲。宇中立上游。  
 皇基安萬國。四海一天家。金殿燕脂雨。玉階錦繡霞。吉士狂似蝶。春人命是花。  
 此生今不樂。身後果如何。  
 擇才不擇德。浪子坐公堂。論政紅燈際。議官綠酒傍。新兵徵畫虎。舊物愛亡羊。



泉脉流隣竇。國財去無方。

蠶桑培國力。朝廷求人才。泮勵張蘇術。揣摩管樂材。須臾惜過隙。咫尺闢荒萊。當見循環理。一陽地下催。

頻年物價躍。聚歛民財窮。聖主豈好戰。將師偏貧功。村落廢農事。壯丁即遠戎。願起楠廷尉。為君守大東。

芷蘭萎西風。惡草何蒼鬱。禮樂皆消沉。教官半歸佛。眼中唯有花。身外如無物。回顧當年情。欲言口已吃。

年代人琴遠。流光連古今。摘芳餐晚菊。採藥入幽林。生理老愈拙。感懷秋更深。殘灰猶蓄火。一片報君心。

中宵倚小閣。素月入吾襟。欲問千古事。為開一片心。吟肩山骨聳。衰髮霜華侵。野詩溫厚語。聊成清世音。

億兆歸真主。文明照草萊。舊恩精鐵劍。新賜白銀杯。北極靈光迴。南山瑞氣開。高年拜殊寵。褒典下三台。

觀瓶花。

赤心南天燭。丹血自離離。孤高寒梅花。皎潔見冰肌。蠟梅香無色。水仙韻最奇。各各天所賦。相親不相欺。主人化工手。聚美一瓶歸。惟他門外客。東人而西衣。

清白樓示垣熊阜。

一杯人飲酒。何遽達天真。二杯酒飲酒。三杯酒飲人。古諺雖鄙俚。汝宜書其紳。哲人不斷酒。自飲又供神。醇醇既醉德。萬物皆成春。和調人天際。禮數見君臣。

庚午秋日。與松塘師。上鹽氏三級樓。

奇構出塵表。鷄犬亦欲僂。虛牕容山月。危檻接水天。登臨茫無壞。胸襟只泠然。凜乎不可駐。愧吾塵土緣。

興國寺。觀圓應俗燭體冤鬼圖。壬申八月。

草茫茫。月淒涼。古墓壞道側。枯骸無人藏。荆棘穿其口。斷斷四伎僵。行人睨不視。氣類相感傷。腥風吹濕燐。隱隱度前岡。無聲如有物。暗中現微粧。錯落瓠犀脫。髣髴翠髮長。昔日盟誓血。模糊染素裳。生前流波眼。秋水結陰霜。蚓笛又蛩



笙。傀儡一戲場。吁陋矣幽鬼。盍現南面王。

謝越後淺野生見饋其鄉名饅越雪。

南紀與北越。相隔千里濶。君掬越山雪。要療山人渴。載以橫雲鵲。今朝來天末。時是開歲日。山家棣正發。梅雪爭清潔。欣君贈饋切。至味自芳烈。調和出仙訣。咽喉惡穢絕。養我說詩舌。留當三伏節。一喫濯煩熱。

街伯英來談舊。

屈指嵐山友。健康獨有君。憶昨旗亭夕。詩成酒半醺。雨餘月欲滴。輕棹泝香雲。嵐峽三十里。春水出花流。一幅明媚景。恍惚眼底留。與君談舊夢。此遊復能不。風雲十年事。在吾一囊詩。世運自消長。正氣存如絲。天地徒欲老。菊凋楓枯時。

十七夜得月。

天風吹海月。吹上萬松林。松影龍蛇走。百尺飲潭心。江山靈爽氣。凜乎入胸襟。

炎涼。

東隣賣女哭。西隣抱妾眠。炎涼如殊域。相見不相憐。薄俗天所厭。小人執大權。

遊霞川廢園。

寒靄橫山色。悲風促短景。絃歌有松聲。笑語無人影。荒圃只蜜柑。舊物一苔井。十年桑滄感。彷徨發深省。

天風海濤樓。

天風吹我髮。海濤洗我瞳。曉起春山翠。晚步秋林紅。古稀長嘯叟。逍遙物化中。

對石。

呼石爲師友。助我丘壑情。此交雖云冷。年久道愈清。沈默相對坐。不見世塵生。所以不相棄。字之曰俊卿。與卿老林下。林深秋月明。萬籟欲無跡。竹露滴寒聲。空山逢石卿。相伴歸雲房。慇懃共分坐。譚熟沙鼎香。卿說人間世。韜晦貴葆光。吾言樗櫟材。猶未忘廟堂。石卿笑不答。山花送夕陽。

無題。

幾年謁宰官。三上袖中書。書達無政績。何異飫蠹魚。決然從是去。南山臥舊廬。三徑有松菊。太似陶翁家。吾生已稀古。海內洋塵多。歸歟秋將暮。歸採東籬花。



莫說青雲事。青雲使人低。不知款段馬。一瓢附小奚。千歲狂接輿。悠然歌鳳兮。

七古（六題六首）

喻鶴。

玄裳子。玄裳子。朝翔天門霞。夜飲廣寒水。愛卿皎潔出天姿。千年鎮受神仙知。西湖處士觀梅夕。東坡先生泛月時。物換星移人世惡。遠歸寥廓勿近危。蓬萊鳥上今非古。鈇彈鐵鏃多於雨。

瓜溪石子陵臺歌。謝田邊城主安藤公恩賜。

田城之封古屋山。瓜溪巉巖勢如刪。鐵精銅氣藏不得。拳石皆具小孱顏。一片靈精入骨紫。飛泉爭下百道水。蘇公會誇仇池奇。未知神秀抗此美。泉激石峙雪華堆。壁間恍聞地底雷。山勢漸平春潭碧。釣磯呼作子陵臺。憶昔嚴叟投香餌。渭上非熊元非類。却晒天官奏客星。脚加帝腹亦閑事。不如雨笠煙蓑人。孤舟遠入洞天春。桃花照水夕陽遲。一竿生計養天真。

瓜溪石武陵山歌。爲宇野桂水賦。

壺中九華昔聞名。几上武陵眼始迎。峯巒拳大雲煙足。漁舟不至洞天明。樵歌相答溪橋晚。茅屋柴門雞犬遠。黃精可食葛可衣。羨君此地寄肥遯。衣冠常見太古風。白首翁媪心似童。不知桑麻促租稅。十里桃花夕日紅。兒孫從古箇中老。靈區塵境不相通。吁嗟石丈君知否。大千變滅一夢空。武陵仙源尋無處。縮在一瓢春酒中。

黃仲祥所摸徐他山蘭卷歌。

一卷橫披寫孤清。墨卷楚澤龍氣腥。秋雨秋風咫尺起。團團露珠泣湘靈。憶昔胡元奪宋土。中原踪跡皆豺虎。蘭乎此時何處參。露根僅存鄭所南。仲祥此卷揮才毫。毫鋒切玉氣象豪。香生硯北撲素壁。風起坐間起翠濤。意在水墨不在蘭。一片神韻照眼寒。觀至卷尾有摸印。篆文奇古朱猶潤。恍疑古人開笑顧。俗手庸工隔幾關。他山徐君已自許。蘭卷長留天地間。

霞峰雪竹歌。促其南歸。

霞生畫竹健於鐵。龍尾生風卷素雪。筆端用意我亦知。不使紅塵污清節。故園



幽夢水竹扉。滿篙新漲沒釣磯。扁舟久載輕竿待。寄語秋風君早歸。

偶成。

寰宇皆如醉。遐想獨醒人。茫茫千萬里。何處問迷津。瓢乎問汝汝知否。古來漫說僊源春。

五律（壹題五首）

松泉園冬夜。

幽築雖云小。能容頭上天。雲松生遠籟。風竹散寒烟。夜氣道心定。霜華吟髮鮮。徘徊顧吾影。憶起雪堂僊。

四壁青苔合。家存一古琴。菲才謚當路。樸學自違今。猿鶴諳故態。兒孫養斯心。依依本嶺月。送影照幽襟。

晚食手親理。菊英芳氣佳。飲餐慰獨夜。骨肉望天涯。千里勞秋夢。一書償老懷。行藏惟有命。樂道忘形骸。

病骨秋愈瘦。深霜信鬢邊。青雲非宿志。白首愧前賢。踈懶消歲月。登臨弄風煙。

乾坤惟涕淚。欲續咏懷篇。

風塵千古事。靜對百憂消。樵客說山鬼。漁郎談水妖。虛懷安適莫。妄聽壓凄寥。和氣融融至。還丹酒一蕉。

七律（六題貳拾五首）

秋懷。

神皇立極海東天。開闢蒼茫不記年。百代邦畿新禮樂。一朝板籍舊山川。登臨阮籍猶逃酒。疑懼張良亦學僊。今古昇沈無限事。舉歸董史一陳篇。

蠶狁凶徒名已遙。中原千古說天驕。邊疆經濟恃蒼海。真宰煦濡望碧霄。大地陽春何日發。東方正氣未全消。烝黎皆受太平澤。處處津梁架鐵橋。

江山萬古日昭昭。王道霸圖遺澤遙。驕侈民風求鳳炙。清明關稅問魚苗。城狐氣息皆堆跖。桀狗性情徒吠堯。竊喜東方仁壽域。樂章猶自有虞韶。

文物昇沉是化工。人生窮處必能通。荒雞夢破屋梁月。白髮愁生禪榻風。只合曠襟容僕豎。莫將尺度短英雄。眼前是是非非事。總附紅燈綠酒中。



世波奔激一年年。代謝行藏皆在天。澆季人情歸傲筭。大都歌曲用繁絃。蕭蕭落木浮秋水。縷縷炊烟和暮煙。蘆荻叢中何處客。晚來乞火向隣船。天開地闢一星辰。獨恠後生誇日新。季世難逢青眼客。熱腸翻愛白雲人。危橋或見引三笑。幽澗何容着一塵。回首大都車擾擾。羊酥牛酪賽錢神。東海神州萬古春。陋居猶喜草萊臣。多年私史孤燈下。傲骨垂竿幽澗濱。野鳥何凌碧霄表。山雲鎮護白衣人。廟堂別有明良出。更始刑名歸一新。諸公當路重空言。拳世唯知法律尊。翠幔玉燈新妓院。西風白艸故侯門。多年京洛違文雅。今日山林托子孫。海岳先生遺訣在。仙家酒熟對雲痕。風搖萬木影蕭蕭。獨見黃花期後凋。君側權臣愁北伐。草間志士憶南朝。依微殘月送人語。寂寞空城接海潮。一路橫塘天未曙。釣竿呼我伴漁樵。年代遙遙桑海移。先王遺法亂如絲。竟令禮樂衣冠俗。變作腥膻窄袖兒。奇巧眩人混鐵艦。奸謀奪國一牛皮。靈刀未必換黃犢。三尺蒼龍躍有時。誰道人生一笑難。斯翁健在戰塵間。目觀東海千秋日。身受皇天十歲閑。季世

文章無白雪。幽棲心事有青山。吟行偶到清溪上。鶴氅垂竿亦厚顏。西風落日舊山川。方伯皆歸避穀仙。禮樂空名千弊帚。詩書陳跡半文錢。書生談治重刑律。宰相振威借國權。世事老來惟耐擲。丹池春酒洞中天。深秋天地屬荒涼。籬菊堤楓委夕陽。世事浮沈千夢幻。官途昇降幾顛狂。胡僧彈藥壓神劍。牛母酪酥登玉堂。此日登高何所賦。西風一掃舊文章。敢向旻天訴數奇。忠誠誓守祖宗規。鴈書親接殊方客。風氣能通四海詩。聞說官情歸刻薄。竊哀民物仰仁慈。荒蕪三徑欲斜菊。五柳先生是我師。法律嚴明禮樂疎。古皇遺澤去鴻虛。滿腔熱血新軍制。數世荒田舊草廬。烈士難揮神國劍。美人爭買鳴夷鏃。幼孫何學蟹行字。日誦先秦未火書。徵兵租稅奈元元。百里榛荆處處村。臺隸衣冠跳白馬。公侯第宅賣朱門。秋來所閱皆銷骨。老去隨看唯有言。一片壯心猶未滅。漫將射御授兒孫。漁弟樵兄末了緣。蘋風蘆雨又年年。山厨經濟茶無色。愁陣談評酒有權。殘菊餘芳敬短景。去鴻片影入長烟。釣竿何托鷹揚志。身是江湖一懶僊。



百年鼎鼎去無涯。行路傾危萬事差。小得意時身輒病。好風景處日將斜。隱憂志士唯醜酒。勝代貴人爭買花。從古世情皆若此。山翁笑植一園茶。  
二千年後仰斯文。三代遺風夢寐聞。敢道殘生能樂水。唯同老衲靜觀雲。清香滿室迎幽蕙。寒碧半窗容此君。自笑雄心未全死。抽毫欲問右軍勳。  
雲臺曠足復何期。此老生涯唯有詩。適意伴僧尋古剎。閑清使妓唱新詞。夢迷漠北風塵際。身在江南煙水湄。好放一篷乘快齊。蘆花楓葉夕陽時。

贈竺貝巖。

化人自在脚爲車。歸與隣翁話五麻。和氣滿堂彭澤酒。清風兩腋玉川茶。澄潭白石秋山月。遲日紅雲春寺花。文字場中吾老矣。詩篇任汝好成家。

贈小出闊湍。

一亭幽事寫孱顏。人生浮沈何足患。螢雪三年閑日月。襟懷百里舊江山。柳呈媚態煙霞裡。梅競精神巖石間。滿郭紅塵不吹到。居然身在白雲寰。

池永萬平罷官。

治理清明海曲民。民風肅穆是王臣。多年郡縣刀錐吏。此日田園花木人。漁弟樵兄談自熟。窗燈爐火意相親。悠然成就長生術。行見僊源千古春。

寄示族人濟卿。兼贈大橋陶庵。

五百星霜陳跡移。忠臣遠裔數何奇。雲封墨水思詩處。雪壓梅村注易時。皮囊陽秋君獨在。腹中筐笥世皆知。人間滿目不平事。枉附仙家酒一巵。

池永水也翁見贈鐵藤杖。予有杖癖。貯數十杖。而鐵藤不在丙

丁科。謝以此詩。

鐵藤之杖苦扶持。物外何知世路危。醉步輕烟微月下。詠歸芳草夕陽時。或懸李賀錦囊句。又逐浩然驢背詩。七十老軀猶壯健。高山好採萬年芝。

五絕 (參拾八題壹百四拾參首)

義兵行。

風塵連北闕。雷雨起蟄龍。東海萬古日。懸在芙蓉峯。  
初疑自天落。一軍三日飢。知是貴公子。金鞍白馬肥。



敗兵如潮水。流入白鳥關。紅氍誰氏子。逢人裏刀瘢。  
純忠大江君。勤王石曼子。請看千秋名。偉業照青史。  
聞道守阪城。又言逼洛下。莫是華山陽。將軍放戰馬。  
兵機如破竹。朝廷討逆臣。野人袖手看。風聲鶴唳人。  
羣后奉嚴令。雷霆擊老鯨。環海皆王土。舟船欲何行。

日本刀。

霜刃莫漫試。白羽莫漫號。蒼生五千萬。淬勵日本刀。  
文明不用武。隣交唯重和。邈矣男子國。刀乎奈汝何。

津田達堂索刀。余貽以虎徹刀。刀長尺五。光芒如霜。神制魑魅。

吾有鏃耶劍。凜凜神氣存。老矣吾無用。貽君試盤根。  
神國多靈劍。龍氣護王基。一躍人驚怪。江天雷雨時。

感懷。

旭日昇江城。松風萬歲聲。周回九萬里。春自大東生。

莫是商山老。衣冠上古風。高歌白雲曲。來往碧山中。  
吾師李謫仙。不言人間事。江湖皆春酒。別開一天地。  
猛政如猛虎。殘刻毒斯民。彼輩猶有語。曰世而後仁。  
千秋青史上。趙武漫胡服。未見遷喬鶯。翻飛入幽谷。  
秦政恣暴毒。嚴律鞭山河。刑徒七十萬。蒼生血淚多。  
混沌穿七竅。貨泉如奔波。立見西江涸。其奈轍鮒何。  
人云善遠隣。吾云善近隣。一朝如有事。相救在近隣。  
上治無為化。緝熙道自存。民心忠厚耳。此外又何言。  
世情履虎尾。人事涉薄冰。海塵不可掃。杞憂又一層。  
人生有廉耻。義重性命輕。遙憶深山裡。刷盡無黃精。  
冷冷秋餘水。巖巖霜後山。幽人重晚節。自養此心閑。  
信越成漢業。吞恨入重泉。子房有上策。避穀全其天。  
劈山通鐵道。絕海開石濠。瓊鋒不可覓。滅裂無纖毫。



復古布大政。廟謨淵源深。上策無他故。所貴一民心。  
海宇大氣毳。人間千萬事。君看造物心。一誠貫天地。  
莫爲千里駒。駿骨老沙場。白草原頭夢。不至華山陽。  
九州不可合。殊方各立家。請掬西溟水。養我扶桑花。  
朝讀兵車行。暮讀石壕吏。少陵千古詩。字字是新淚。  
樂天新樂府。讀至折臂翁。感傷不終曲。的切寫幽衷。  
田家有一子。二十奉歡娛。翁媪和淚語。有兒不及無。  
黃鳥辭丘隅。飛飛入幽谷。千山風雨來。啾啾鬼神哭。  
得無新亭泣。將賣舊山河。文明開化字。底止竟如何。  
漁舟如小屋。推蓬坐晚曦。十年湖海意。獨有釣竿知。  
天地有真宰。行藏任屈伸。聖人孔夫子。東西南北人。  
肩隨洙泗流。其源在正己。修身仁義道。先從廉耻始。  
戰國縱橫際。爭奪人耶天。七十弟子外。獨見魯仲連。

周德方式微。豺狼滿天地。所貴唯形名。禮樂皆閑事。  
夢觀蟹行字。渺渺捲橫波。讀律不讀禮。其奈生靈何。  
我無管樂才。何期管樂功。仙人赤松子。千古仰高風。  
欲追餐霞仙。碧山來學道。長錢汝可親。聞有黃精草。  
生遇太平世。看盡上都花。七十猶未死。傲骨老烟霞。

有田郡尹草野正信。所藏金重刀。星鏑霜鋒。神氣逼人。稀世之寶也。

草公有寶劍。照膽見毛吹。國家十年外。必有一割時。

聞薩人橫山壯太郎建白自盡。慨然賦之。

胡塵何日散。九重雲霧深。慷慨君一死。維持億兆心。

東京春事。

太平自有象。兒女不知愁。日看柳橋柳。來擊幾華驄。

武庫雜詠。



海驛鳥夷雜。海樓春酒多。傍有忠臣墓。行人閉眼過。  
綺席水精燭。玉杯綠葡萄。寄語留連客。莫遺日本刀。  
醉別青樓上。春愁似酒濃。萬里雲濤遠。郎舟喜望峯。

熊中。

人世悠悠事。心期唯曜靈。浮雲有時盡。萬古熊山青。

那智瀑。

初疑銀河落。濺向織女機。絕壁三千丈。玉龍劈石飛。

生石山謠。

吾家生石南。北望生石峯。君家生石北。南望生石峯。

芳山謠。贈兒嶋明處。

菊池喜有朋。兒嶋同門地。羨君川上家。飽挹芳山翠。  
夕仰芳山月。晨望芳山花。芳山終古色。依依在君家。

舟中。

學劍又學書。此事竟無成。得意釣竿耳。瓢乎託殘生。  
月色那邊好。海南蘆荻洲。莫是五湖客。一棹任優遊。  
雄談驚海若。氣衝斗牛間。慷慨傾肝膽。長劍霜華寒。

山中。

橋西有茅屋。是我讀書處。澗水流不留。白雪自來去。  
山中無世事。身老心愈閑。負暄少年日。坐看太古山。  
待君君不至。林徑日將曛。漠漠秋山遠。出門望白雲。

山夜。

昔人對月酌。與影爲三人。無月又無影。獨坐憶昔人。  
今夕復無月。來尋溪寺僧。松林多雨意。隱見讀書燈。  
溪風吹雨斷。窓白欲三更。怪見龍蛇影。不知松月生。  
不學黃綺隱。何期青紫倫。月色清透骨。幕天地帷人。  
夢醒夜未半。讀易至四更。月上寒潭白。魚龍寂無聲。



山遙月上早。空明坐清輝。不知桂花落。白露濕人衣。  
夢破虛牕白。乍疑曉色催。夜深人境遠。隔水疎鐘來。  
溪月猶未上。平林夜烟迷。乍見霜華動。幽禽再四啼。  
佇立小池上。夜深水益明。桂花飛無影。竹露滴有聲。  
天上桂花發。人間風露香。不知桂花處。只見滿天霜。

上大悲閣。

送秋來海寺。地閑人更閑。遊雲不歸岫。紅葉照寒山。

三敬菴觀蓮。

不知安樂國。去此更何鄉。清風非人世。飲餐有妙香。

秋思。

芙蓉不耐露。碧梧先知秋。階前掩淚立。蟋蟀代人愁。  
空懸中宵月。照妾萬緒願。玉露墜無聲。桂花天香遠。  
題詩書落葉。調苦蟲語悲。西風何無賴。下向月中吹。

浦上所見。

海氣連天黑。茫茫送落暉。登閣不能久。猛風欲裂衣。  
小立秋江上。江空饒殘暉。杳杳歸雲外。一鳥背人飛。

辛未正月。餞恒太郎之東京。

阿恒年十六。困學書劍人。男兒四方志。行矣帝京春。

戲題玉溪朱蘭。

東坡創朱竹。紅蘭出玉溪。青紫皮相耳。千秋德是篔。

觀池柳潭墨竹。

池生寫墨竹。不借朱砂功。相對清風起。一掃胸塵空。

暗香茶寮。

夜靜茗烟濕。爐溫有別春。不作梅花夢。暗香清徹人。

示恒貞兩孫。

曉揭寒燈讀。尚書無逸篇。憤發銘肝膽。聖門志學年。



玉洲小景。

竹香微風動。細細人小詩。夕涼欲惹雨。遊泳魚先知。  
茅屋雨三椽。清風五百竿。我欲買山隱。此景買最難。

宿由良守應宅。值守應在西洋。

遠客今何處。茫茫星斗高。空齋此夜夢。萬里落雲濤。

岡氏藏介石蘭卷。余借觀二年。壬申秋日還之。餞以小詩。

幽夢見屈子。相携過三湘。夢覺君不在。清風琴書香。

明朝君歸處。風雨撼千山。情交不可斷。對酒唱陽關。

己巳秋。余買釣舟。舟長丈餘。可坐數人。九月既望。携陽山花溪

二子。泛淺浦南灣。撫景賦詩。遙追蘇遊。以山高月小。水落石出

爲韻。

何辭玉帝家。流落在人間。無主風月在。賞心遍江山。

薄遊不載酒。賞心信輕篙。東山月未出。潮頭漁火高。

南岸秋潮滿。松堤江雨歇。幽事豈遠尋。只期前灣月。  
遙看海西山。悠悠青未了。莫是故人鄉。數峯雲外小。  
同襟同一舟。吾黨二三子。詩酒坐空明。不知天耶水。  
新買一扁舟。來共漁家樂。湍魚跳作聲。夜半秋潮落。  
水天皆霜華。萬頃玻璃白。吾有清奇句。逸響如金石。  
潮氣挾風籟。巖洞夜如漆。鐵笛弄新聲。水湧魚龍出。

曉赴淺浦途中。

氣激羣動寂。數里聞鷄聲。炊烟猶未起。環郭曉江明。  
羣山皆欲雨。一水遠爲雲。松林燈火碧。疎鐘破曉聞。  
曉色衆山遠。寒光一水明。天然倪迂畫。身在畫中行。  
煙水二三里。江頭欲曙天。蘆間揚細火。知有信宿船。

辛未十一月朔。與孫武恒真。詣應神祠。

冬郊二三里。離離霜樹丹。忽有邊塞興。風雪打馬鞍。



伯馬如飛鳥。仲馬如流星。只看雙鳥帽。驀然入旗亭。  
兩郎如連壁。共駕雙馱駝。駸駸決目去。忽到畫橋西。  
停鞭夕陽下。鞭影與橋長。挾路人爭見。藤家二玉郎。  
數里小春景。山皆帶落霞。溪橋暫立馬。水映早梅花。

壬申九月。遊生石山。以東坡秀語奪山綠為韻。

數里松楓溪。秋餘皆錦繡。遙知瀑挂邊。雲外孤峯秀。  
查然溪寺鐘。寺在雪深處。青山無一塵。只聞樵者語。  
小憩飛流前。吟衣濕水沫。欲續青蓮詩。忽被遊雲奪。  
健友一吟杖。地閑心自閑。不看人世事。身外皆青山。  
兩岸紅楓林。且映杯中綠。宜弄輕舟歸。一川秋後綠。

十月朔。携恒貞兩孫及冷雲諸子。遊靈巖寺古趾。以出門何所

見白雲抱幽石為韻。

欲作靈巖遊。預卜霜晴日。木落山多現。溪壩石皆出。

迂路從山脈。曲溪通水源。鐘聲不知處。白雲鎖寺門。  
籃輿載筆硯。子弟行且歌。山遊唯可樂。世牽果如何。  
山空遊鹿來。林邃樵歌去。幽人與未盡。更尋泉窮所。  
遠山看者近。近山行却遠。甲乙丙丁山。數來掌上見。  
絕巔來回首。長橋如略約。海氣與山煙。茫茫十里白。  
山行五六里。山邃遠世氣。百尺巨巖上。開襟納遊雲。  
巖洞螺殼堆。青蠅不可掃。腥麤忽襲人。有蟻大合抱。  
紅樹白雲遠。冬景日暮愁。獨往觀山者。莫失幽人幽。  
疎鐘隔水遠。寥寥寒山夕。海嶽不言意。欲歸又拜石。

古碧樓。送井上從吾歸熊野。

路遠書愈貴。時危交更深。相逢無一語。同襟百年心。

禪客。

禪客虛堂夢。拍天巨海流。萬里猶可渡。蓮花大於舟。



淺井氏女索詩。

小玉良家女。輕盈擬凌波。宜慕湘水竹。莫學洛城花。

梅花。

羣芳皆凋零。荆棘塞天地。梅花獨古香。如見孟夫子。  
莫說羅浮夢。恐汚林下真。靈氣令人敬。一片伯夷神。

續飲酒。示孫阿恒。

吾家葡萄綠。手貯小白墪。携來長松下。下物有黃柑。  
流連令我忘。所以與酒斷。終古一聖人。無量不及亂。  
伯倫酒德頌。道與天地寬。古人真面目。不在醉醒間。  
夜靜孤燈冷。披書對昔人。千秋陶靖節。其醉全天真。  
吾性不耐酒。每飲畏三蕉。老知酒中趣。天高酒星遙。  
何問量多少。和諧琴瑟音。獻酬又有禮。燕樂嘉賓心。  
百杯聖賢酒。瀉此抑塞腸。青蓮有真訣。身世兩相忘。

千秋君不見。只見東籬菊。追醉陶先生。山家酒正熟。  
一酌形骸和。三酌世塵空。聖人不可及。心契陶家翁。  
真淳陶栗里。佯醉阮步兵。酒國荒已久。恒也與誰行。  
晉祚正陸沈。識君首陽心。一去千秋遠。追隨五柳陰。  
芳醪二三酌。萬物與吾融。身外無一物。熙熙坐春風。  
太白三百盃。子瞻三蕉葉。共成千古名。不爲酒臣妾。  
大哉先王澤。既醉億兆民。江河是芳醴。山岳皆成春。  
聖人製禮樂。酒亦居其中。可以供祭祀。可以助會同。  
我孫好軀幹。擊劍若迅雷。願斬戎王首。爲作濁醪杯。

自述。

七十身老矣。白髮滿頭雪。報國忠義文。鑄肝不可滅。  
十年報國志。未酬燕雀量。默思十年事。塵垢不及忘。  
世事今如何。冉冉無底止。殘生有遺憾。不爲君王死。



七絕（七十五題壹百參拾八首）

東北平定歌。

慈雨仁風洗戰塵。歡呼起舞日東民。至尊遙自紫宸望。北道花開千里春。  
悠久神威振五洲。北辰星下定皇猷。即今御府新圖籍。添見蝦夷十一州。  
鎮府名存九百年。斷碑苔蝕臥荒烟。山河今日復依舊。恩露春深秣鞞天。  
海天新霽曉暎紅。鳳駕霓旌方向東。一洗千年冰雪色。山河草木浴春風。  
何物頑童抗六師。檻車千里命如絲。罪臻大辟猶寬宥。不做唐家征蔡時。

鄉學。

漁童樵子日相延。來上聖門鄒魯筵。前路千程萬程事。琅琅讀起學而篇。  
浮華萬卷皆流俗。魯論半篇經濟足。身未能修復恐聞。一章一句一金玉。

瀨見善水見訪乃賦示。

仁人志士致身秋。敢約三章傲漢猷。揭出耶蘇禁遏字。山川赫赫古神州。

聞五瀨君韓令倉敷遙有此寄。

月落樓前海鹿啼。海秋天思夜潮迷。故人今夜空相憶。夢繞雲濤西又西。

恩寵錄題詞。

七十虛名遍海東。風雲月露一詩翁。家多子弟身強健。總自祖先積善中。

攝州詞。

巨海茫茫世事非。胡塵咫尺逼王畿。楠公祠下慨然淚。翻作攝山風雨飛。

感懷。

擊節文山正氣歌。人心猶未屬消磨。登高還濶窮途淚。處處園陵喬木多。  
征韓曾試大東刀。十萬旌旗捲海濤。蓋世功名何處在。秋風挾雨墓松高。  
英雄一去跡難尋。陵樹陰陰霜氣深。江海唯餘秋夜月。清輝照見昔人心。

北海道巡遊歌。寄示鐵雲師。

行盡毛人更赤人。茫茫窮髮道途新。層氷積雪三千里。一隊舟車近北辰。  
寒潮日夜疾風衝。鉞路北旋知昔蹤。一舸空明入水海。波濤眼冷水精峰。

元日諸官吏見訪。乃賦示竹內前野兩少屬。



猛士腰間日本刀。鐵精夜化老龍號。東風未起養花雨。雪壓喬松百尺高。早取名聲達玉堂。平生言語挾風霜。即今四海無征戰。閑却君家丈八槍。

瑞橋歌。

昔人曾說橋中仙。談笑園基可引年。自是蓬萊多瑞氣。霜香直上九重天。昔人曾說橋中仙。談笑園基可引年。自是蓬萊多瑞氣。霜香直上九重天。

書明治三十八家詩後。

文天之後幾詩編。菅老騎鯨四十年。一首風神誰學得。當歸芍藥滿春田。詩佛先生瀟灑文。醉毫描竹淡於雲。性靈格調請休說。一室清風對此君。殘荷枯柳恨秋闌。一道晴川環屋寒。三十六峰明月夜。誰呼賴叟倚欄看。紅亭春夕雪兒歌。銀燭光涵金叵羅。一刻豪華歸舊夢。黃薇秋色近如何。白谷山人傾百川。醉中健筆役神僊。雙林往事尋無跡。春雨秋風二十年。溪梅雪白野桃紅。本分天機歸化工。此妙如今與誰語。豐山無復淡窓翁。鯛化仙醇馬入堂。當年傑語破天荒。詞林零落梅翁逝。韓海蘇潮獨渺茫。杲杲晴曦出浪紅。東州三月養花風。金華仙容步虛曲。不問人間雌與雄。

欲取漁洋粉老顏。寥寥文字幾回刪。詩禪衣鉢誰傳得。夢冷湖山與枕山。臺閣山林豈背馳。聲詩本與世情期。天章老衲眼如火。照破方今妖妄辭。塞士何能鑄謫僊。時人麗弱學樊川。紅南別有霞峰在。樂易風情近樂天。欲救近時頹廢文。諸公爭進幾詞軍。誰知三十八家外。剩見能詩老冷雲。

讀秦記。

六國平吞說偉動。嬴秦天下落深文。霜威嚴肅地將裂。野廟狐聲中夜聞。百年耕戰蝕山東。郡縣新成六國空。刻薄無情天所惡。楚人燒盡阿房宮。剛愎心期萬世宗。少恩慘覈地難容。瀉池使者有妖語。誰識祖龍為死龍。戰伐功成秦自亡。一時帝業迹茫茫。素車白馬道傍拜。十二金人淚萬行。山河悠久沒光暉。殺氣衝天入紫微。禮樂如烟王蹟熄。中原風化出韓非。

和歌浦秋思。

荒墟秋色草離離。南國衣冠屬式微。唯有史編傳萬古。紅風山月使人悲。蘆邊鳴鶴水雲姿。赤老神來絕妙詞。千古遺音誰續得。一篇天籟自然詩。



野人頂禮意何如。救世觀音大士居。猶有山僧記恩寵。碧紗長護老公書。  
 佛閣凌虛雲路斜。即今人世憶龍華。登臨難認雄藩跡。巖戶蜚村多落霞。  
 故國秋風魂轉銷。樓臺落日影蕭蕭。伽羅山下荒涼景。剩見松間不老橋。  
 彷徨懷舊自忉忉。月照叢松鶴唳高。試上天臺撫秋色。鳴門潮勢卷寒濤。  
 八月新潮打岸流。神娥廟古玉津洲。樓姿塔影依然在。閑却明光煙水秋。  
 鬱鬱行松年幾千。海城六月作涼天。霜枝雪幹化龍去。殘甲片鱗人為傳。  
 郊原草白月如霜。三百年華夢一場。畫壁粉牆無宿影。狐鳴鬼嘯夜茫茫。  
 隔水霜鐘緩出山。依依秋色暮雲間。養珠寺畔送君後。古木寒烟屬等閑。  
 藩公遠去曷時歸。沙鶴戀雲迷夕暉。悲慘風光猶在眼。一聲號角吐烟飛。  
 一元十二萬星霜。造物演成靈戲場。小角仙人猶未死。葛城山上見滄桑。

罷官。

紫陌紅塵一夢回。人情冷熱逐時開。兒童遮路笑何事。昨日相公穿褐來。  
 何願功名垂竹帛。優遊自似蓬瀛客。九臯鳴鶴迓清秋。曉日破波東海碧。

白屋何誇世系豪。自甘殘骨老風濤。釣竿不是富春客。莫道先生能養高。  
 己巳重陽。

罷官歸在碧山鄉。籬落蕭條野菊香。繞膝兒孫皆獻壽。吾生七十二重陽。  
 訪瀨見善水。

敗籬荒迳菊猶殘。落日蒼烟結暮寒。數里溪山紅葉底。風流野客訪清官。  
 示濱參政。庚午秋日。

蠻雨戎雲秋欲曛。漢家廟算日紛紛。山中方熟黃花酒。不為風塵訪使君。  
 九月十九日。與兒孫遊有水。

桃花洞口問迷津。慚為晉人追後塵。九月江南好風景。一家行樂氣成春。  
 白蘋紅蓼夕陽迷。半日閑遊十里堤。石鼎烹茶雲未熟。孤舟流入石潭西。  
 兒孫繞膝坐吟詩。蓬底微風裊釣絲。枯柳洲頭看洗馬。水村山郭賽神時。

秋晚偶得。寄示家霞峯。

君恩新賜看山福。歸臥南山舊茅屋。薄酒微曛不待扶。先生獨訪隣園菊。



南中偶成。示瀨見翠灣。

人今何在惟空屋。天運將回是多福。十月江村米似金。真成晚稻瓊珠熟。  
題藪長水美人吹笛圖。

楊柳風微春物熙。美人笛韻獨淒其。梅花吹落暮江水。無限閑愁上翠眉。  
東快處師。索其畫。

投宿南中山嶽間。去留一任一身閑。此遊欲償平生願。滿幅雲煙快處山。  
酬霞峰盤溪。

老大罷官歸故林。青山復對舊時琴。桃花水暖送春鯉。此意深於東海深。  
吟壇諸彥競如林。幽澗何人問破琴。海內知音天一角。金華山上白雲深。

訪安休真逸。

冷官隱宅水邊尋。名草山雲與竹深。唯有明光浦頭月。依然來照故人心。  
題水野綠岡墨竹。

人間何處問窮通。冷熱乘除夢一空。高興時揮枯淡墨。數竿幽竹見清風。

和小出小泉送友韻。

目送歸帆淚不收。離情深與海雲侔。空城寂寞寒鴉宿。一任蕭蕭落木秋。  
晚秋訪古屋子。

秋葉山前隨暮禽。半扉樹影已沈沈。浮雲流水廿年事。語盡寒燈一夜心。  
辛未元日。

罷官歸臥水雲鄉。幾樹梅花一草堂。好是山中安養地。恩衣春暖服葵章。  
元日寄東京故人。

海天日上水溶溶。一色烟霞萬里濃。青帝靈威君看取。春風遠度喜望峰。  
七十年來詩酒仙。風流何羨海棠顛。悠然享受人間福。生遇清明第四年。

紀三井寺大悲閣書懷。

吾是清平詩酒仙。大悲閣上弄風煙。慈雲已惹養花雨。喚友好浮春水船。  
時平萬物共昭昭。雨洗山河妖氣消。水自含春山自笑。不須詩客說蕭條。

聽雨茶寮。



八〇  
爐紅欲燼茗烟低。袖被夜溫春意迷。人遠地幽塵氣絕。一窓微雨水禽啼。

淺井氏女索詩。

慈帷守節百無慚。小玉今年年十三。夜冷霜嚴人不睡。紡車餘力讀周南。

贈遠藤子畏。

各各自安頭上天。休言世態薄如烟。喜君交際能堪久。水綠山明二十年。

酬齋藤櫻門。

茅屋三間竹樹門。斷橋流水十家村。白衣新帶葵章色。無限藩恩覃子孫。

井秀峰獲波平刀。

燈前對酌見餘豪。談笑生風林木號。清世欽君有深慮。脫刀令出買霜刀。

贈井丹岳。

鯨海熊山氣象豪。畫鋒精鍊銳於刀。神機所發風濤激。南北混流歸一毫。

觀鶴。

蓬萊使者足仙姿。翔舞和鳴野水湄。皎服素衣君且去。人間無數鐵丸兒。

題畫。

其名爲草實非草。三秀五莖抽地好。君作此圖誰得知。人間無復商山老。

(靈芝)

江天秋冷暮煙空。小艇歸維枯柳東。渭水富春分顯晦。千年佳話屬漁翁。

(漁翁)

鎮西八郎箭鏃歌。爲小出閣湍賦。

箭鏃冶工舞鶴友。英所模造其鋒四寸五分。其莖一尺一寸。

七分計長一尺六寸二分重十兩。

兄弟鬩牆猶奉王。禍源無奈出天潢。深文左府彼何意。閑却雄詔鎮八郎。  
上策不成天柱摧。坐教平族逞奸回。將軍一矢終無用。柱在門扉觀後來。  
摸成大鏃有光芒。千古雄名鎮八郎。欲藉神威壓妖魅。田家新製綠沈槍。

館山令某索詩。

片帆漫指海天東。從古滄洲路不通。五百仙人何處是。茫茫月落水雲中。



東海寒潮歲月流。荒涼誰訪故園秋。清風明月房山夕。一曲關山君自愁。  
簡學齋。

天遠人遙月色愁。海南秋思轉悠悠。清沙淺水無風浪。野鶴閒雲斷送秋。  
仙人笑語在瑤臺。雲路迢迢月十回。憶起鴨子春雨日。東山秀翠照詩杯。

秋日偶題寄家梅軒翁。

蘆花楓葉落長流。獨客傷時水上樓。海氣連雲秋色遠。西風載到滿帆愁。  
凜凜霜威逼曉衣。屋梁殘月益清輝。喬松影落龍蛇走。匣裡鐵精鳴欲飛。

仲秋所見。

山堂月上雨晴時。誰促閑人適意詩。玉兔應嫌吟筆陋。故收奇彩入雲帷。

辛未秋晚。

王公邸宅半栽茶。市井傭僮皆駕車。欲向橋頭買秋味。世間何夥故侯瓜。  
寂寞鼎湖龍不回。人間觸目只悲哉。千山兀兀萬松拔。一任西風卷地來。  
蠶絲新裁窄袖衣。千年劍佩滅光輝。朝元閣上西風急。御苑紅楓挾雨飛。

某年正月。與冷雲師遊京師。淹留彌旬。師不告而去。蓋厭紅塵也。辛未秋日。追作此詩。

紫陌紅塵汚客衣。高僧向我促歸期。千山雪滿春寒甚。猶是蛟龍蟄伏時。  
京城綠酒滯歸期。臘尾春回世事非。野鶴豈嘗塵土物。閑雲一片背人飛。

宿瀨藤某宅。

閑牕話舊茗烟輕。野水環門隔世情。一夜神澄不成睡。稜稜吟骨坐鷄鳴。

石垣歸途。夜過下津野村。村爲十世祖了心君婚家白樿氏故墟。愴然有此作。

疎林淺水夜淒涼。十世裔孫來斷腸。懷古低徊君不見。蟲聲滿耳月如霜。

兒輩自東京歸省。舟遭風濤。幸得無恙。詩以記喜。

辛未十月十日

噓喻纔通進退窮。舟船殆入海龍宮。團欒今日笑相見。脈脈春回杯酒中。  
千里自由舟路平。一家燕鴈去來輕。依依楊柳遠相送。雨雪霏霏邇且迎。



辛末季冬。借北村氏待月園。爲遊息之處。更名愛日軒。

一莊幽築竹成門。小屋窗明可負暄。烏白千株柑萬樹。素封恩是帝家恩。昔年既賦小遊仙。白髮蕭蕭未返天。今日再遭清世澤。復同隣叟說豐年。

壬申元旦。

清曉題詩筆有神。竹香梅影共成春。兒孫繞膝青山靜。偏喜全家遠海塵。贈東京故人。

名都到處草離離。閑筆漫催懷舊詩。唯有芙蓉天外色。陽春白雪似前時。

二月晦。施無畏寺觀花。

輕雷一夜暖愈加。琪樹玲瓏大士家。雲鎖樓臺春寂寂。幽人來訪雨中花。

古碧樓即事。

漁笛悠揚破暮烟。愁看古碧小樓邊。兒孫相伴來懷舊。紅樹青山五十年。

懷古。

繁華一夢散如烟。寧樂春風古塔邊。難奈世波從巨海。簪花人去已千年。

(奈良)

新畫難窺昔日真。地經兵燹菜花新。觀光猶記繁華夢。多少樓臺烟雨春。

(京都)

昔日春風吹紫裙。遊人如蝶不知曛。笙歌今罷嵐溪夕。唯見寒鴉宿白雲。

(嵐山)

奉懷三位源公。

蒼茫往事結愁腸。憶昨優恩謁玉堂。兀坐思君君不見。滿山橘柚夜雲香。

寄齊藤櫻門。

竹屋柴門生石西。暮雲隴月夢魂迷。哀哀呼覺山人睡。橘柚香中蜀鳥啼。

明光浦舟中。

北邙何處起南翁。古廟寒煙暮色空。滿眼荒涼秋萬里。舟人只受一帆風。

借盆蘭。

高姿流落可憐生。相遇何忘幽谷情。一路香風人競見。小車輕幕載芳卿。



介石水墨梅花。爲赤桐桐陰賦。

介石畫梅惟畫神。毫鋒如劍發。新韶華鎮向壁間駐。一室東風無盡春。

東京春事。

鞭影揚揚白馬驕。四蹄芳草落花饒。紅情紫意人如蝶。腦殺春風楊柳橋。

造物巧振天地權。樓臺變滅見桑田。豪華一去夢無跡。處處林園燒炭烟。

西京秋望。

八省東遷第宅空。御陵松柏足悲風。千秋一樣東山色。空送深青入故宮。

星辰落落碧天空。月色霜華滿洛中。莫是鬼神中夜語。泉山松柏起淒風。

七月十夜。與廣賢師。上瑠璃光閣。

綵燈萬點照山明。雨歇琪林甘露生。幽壑潛蛟何不舞。寶光流入闍婆城。

補陀山上月明時。琪樹金林花滿枝。四萬六千爲一日。觀音禮拜勿生疑。

胸塵皆化玉壺冰。乾闥婆城秋月澄。世界空明無色相。白衣大士是吾朋。

曉行。

啓朋如月衆星空。已見東方一角紅。繞郭青山煙欲散。人行茄葉稻花中。

露氣侵人曉氣濃。猶看白鷺宿堤松。殘星漁火半收影。漠漠江雲遠寺鐘。

龍泉師不來。

陶家五柳葉將黃。何事遠公遺若忘。料識法袍能化術。人天調御苦津梁。

訪貝巖師。

烟水悠悠鷗鷺心。半瓢村酒適幽襟。貝巖衲子隱棲處。纔到寺門雲已深。

弔快處師。

江頭花落水蕭蕭。此地重來魂欲銷。疎雨淡烟人不見。天田渡口暮潮遙。

送田金波之銚江。

東寧河畔水鄉秋。河水悠悠送遠愁。十二橋頭明月夜。誰家玉笛落孤舟。

壬申九月四日。將遊生石山。至隈井村。有故歸家。

昨夜夢遊泉石間。朝來曳杖望孱顏。往原無意還何恙。一片去留雲影閑。

晚秋借北村氏松林採蕈。



一林笑語答樵歌。行樂秋深碧澗阿。松蘿上盤詩料足。斬新風味不貪多。  
冬日宮覓川來訪。賦示。

別來白首一傷神。無奈追年物物新。夜半嚴霜風有力。盡飄弓劍作胡塵。  
古劍寒燈中夜心。幽人玩易洗塵襟。虛窓忽映東林月。三徑秋芳霜氣深。

書大原重德公事。

玉帛會同天地春。群邦奉職悉來賓。扈從三萬唯洋服。裡見儼然袍笏人。

端溪小硯。

硯海秋高鯨鰐橫。閑愁日夜役毛生。十年寫盡風塵事。鄉是吾家玉帶生。

書風雲雜記後。

天門虎豹劈雲行。陰壑蛟虵捲地橫。欲使兒孫知往事。近聞隨得役毛生。

田家樂。

野客幽棲在碧山。十年心事白雲閑。寄言屋外梅花水。莫送清香出世間。  
十室之村飲一泉。竹煙日煖和茶烟。有源細水能堪久。二頃田園三百年。

壬申冬日。以病辭徵。

祖宗一旦脫朝簪。淪落蒼江歲月深。衰老何能論變理。釣竿長養待清心。  
病餘殘骨尙長年。人世彭殤一任天。敢道宮商能度曲。破琴塵滿旣無絃。

五古（拾七題參拾壹首）

北海道。

國家方無事。衆賢奉帝勅。開拓十一州。此地溟渤北。仰頭看辰星。身至天地極。  
行營不思家。憤發報皇德。唯願驅龍蛇。擴壤播黍稷。刺肌胡風淒。染衣邊月黑。  
霜威照劍華。雪陣倍弓力。從古有石弩。玄熊充艱食。新政豈不好。所期或難得。  
何人採此詩。進奏玉墀側。

感懷。

勤王無寸績。白首唯厚顏。秋風來千里。肅殺滿兩間。季世百事退。老情何時閑。  
昔日同心友。遺吾歸道山。  
殘生投翰墨。寄跡釣漁翁。綠傾蒲葉雨。紅動蓼花風。漁家錦世界。何減藥珠宮。



化工餘師妙。觀來在箇中。

非才豈足用。學稼聊種園。袍笏無夢到。狂愚名自存。明月一竿手。清風十世門。高年歡娛足。繞膝有兒孫。

田園二頃產。清穆百年家。兒孫稍識字。僮僕善成花。將相不足羨。神仙又何加。東籬秋色美。一室醉流霞。

欲識今秋事。請聽詩史詩。人情錯冷熱。月色任盈虧。竹簟清宜夢。葛衣輕適肌。節在重陽後。恰疑三伏時。

古書不足讀。罷去此登樓。風雨西北至。山河自成秋。松柏龍蛇走。烏兔歲月流。方知魯連意。踏海入滄洲。

事去故人疎。年高猿鶴存。併書賣別墅。觀菊借隣園。紅葉寒山徑。白雲古寺門。家風重親睦。內孫及外孫。

生前一盃酒。身後千歲名。太白有此語。妙理出精誠。歸來陶彭澤。登覽阮步兵。三仙可景仰。酒星天上明。

聚美登臨景。滿望獨立前。江帆載暮色。山閣入冥烟。畫手今誰是。騷人皆歸泉。風華不可駐。空此度流年。

老知初志誤。妄意期人豪。講道仰三代。論兵重六韜。弊舟怒濤起。枯木風雨號。孱劣吾慚女。腰間鑊耶力。

瓜溪石擎天峰詩。謝田邊猪野民藏。

一片瓜溪石。八面碧芙蓉。陰壑鬼神秘。千古秀靈濃。下有飛泉瀉。上有白雲封。故人遙寄我。交態一謙恭。置之几案上。相見如相逢。崢嶸雄雋氣。使我起老慵。肅然斂襟坐。引杯想清客。譬之命世劍。光燄攘群凶。峻絕不可名。呼成擎天峰。問石石不荅。深洞撫玄龍。唯有雄風生。一掃塵熱胸。

街伯英松濤茶寮。

吾有一片雲。裹自山中來。向君茶寮放。繚繞結不開。雨細春晝永。松濤喚夢回。

中村陽山畫蘭。

一花又一葉。劍氣逼人青。陽山弓槍手。畫蘭吐清馨。一令屈子見。未必賦獨醒。



陽山所藏松倉鄉義弘刀。

天許七十老。始觀松倉鄉。鐵精龍蛇閱。星文動神光。匕首不盈尺。寒芒萬丈長。  
西京村田香谷。携小赤壁石。來索詩。

癸酉六月二十七日。午夢得此詩。

危橋架小澗。柴門洒掃新。相逢白衣叟。一揖如故人。此地非凡境。梅花修竹隣。  
賀外孫柏岡市二郎生女。

癸酉秋晚。飲千古碧樓。

薄暮海雨歇。新月在古松。我來倚小閣。高揖明神峰。臨風吹鐵笛。水湧驚魚龍。  
來倚海樓望。白雲度水飛。百里皆秋色。寒濤濯我衣。一飲杯中月。相伴歸溪扉。

記夢。

水皆連村落。無山不養霞。居人或沮溺。耦耕事桑麻。疑是非人世。有棗大如瓜。  
九月十三夜。三更睡覺走筆。

夢回秋夜半。燈冷不成眠。微風揮竹露。細響入松泉。推戶望林月。滿山唯翠烟。  
枯坐胸塵滅。雲庵老詩禪。

書鏡柄。

長鏡白木柄。園荒蔓草多。蔓草不可掃。何望章平瓜。吾歌汝且聽。欲續同谷歌。  
弔高垣信道癸酉十月十五日。

夕陽黃葉處。君已歸泉路。秋水流不留。秋山日易暮。野徑採寒花。來供故人墓。  
誰知白髮翁。低徊歌薤露。

嘆惜石莊叟。溘然歸澗阿。孤清潭底月。獨立雪中花。臨死猶呈志。文章藹曉霞。  
賢妻有婦德。稚子足成家。

題酒瓢。



某山又某水。一一掌上連。晚霞浴海日。紅樹破寒烟。安得道源書。題以李青蓮。不然杜陵筆。一語能驚人。不然韓蘇力。撫景泣鬼神。萬象供驅使。靈氣答蒼天。瓢乎汝知否。酒德天地傳。

觀偶戲。

衣冠坐廟堂。燕石亦生光。硜硜小人耳。此輩斗可量。世既無文王。漁老豈鷹揚。笑顰總依樣。何異木偶場。

偶感。

家在南海濱。祖訓遠世塵。雖無素封產。幸爲太平民。當門春水綠。能容釣竿人。春江一夜雨。春水浮花流。仙源杳何處。一身寄虛舟。悠悠垂綸者。知心有白鷗。五六里春水。三百株梅花。偶有半瓢酒。來酌野人家。世事非吾責。與會撫琴歌。劍書兩無成。赤手張詩軍。幽苦草蟲語。自吟獨自聞。李杜不可接。天籟度遠雲。

七古（七題七首）

安藤丹鶴公賜蘭。

神仙丹鶴公。贈我一枝蘭。蘭乎君之操。幽馥染衣冠。仙人笑語夢耶非。樓上天風六月寒。

尾州歌。

十二城樓聳天半。樓上金鱗光爛爛。金鱗去兮眼界斷。豪華如洗炎涼換。東西古今同一嘆。銅狄僊人曾辭漢。

禱雨。癸酉六月念八。

久旱安知昊天意。千村萬落皆赤地。蒼生號泣奈我何。水車軋軋飛血淚。誰將此苦訟帝傍。散人無責又焦腸。爲把鐵笛吹明月。一聲驚起海龍王。

黃仲祥那瀑煙雨圖歌。

誰駕白龍上九天。滿山風雨簇雲煙。太古女禍補天年。藏決銀河造瀑泉。功成天地開闢先。有圖以來歲十千。衆工仰觀皆嗒然。仲祥椽筆役神仙。延我復在雲之巔。愧我才非李青蓮。

賴山陽遺物真龍硯歌。爲橫井鐵叟賦。鐵叟善畫蘭。故言及之。



癸酉八月。

憶昔賴翁對硯磨墨時。三十六峯帶雨奇。朝蒼夕翠歸椽筆。盡捲煙霞入雄祠。又憶十年寒燈修外史。源平紛擾在寸咫。承久以還數百年。世教滅裂若浮煙。賴翁竊抱春秋例。一掃雲霧日月懸。德川之水波不驚。無窮皇運屬昌平。安知巨猾弄逆兵。一夜猛燄燒西京。硯龍逃潛大湖水。鬼神呵護期騰起。賴翁逝矣硯池乾。無復人携上文壇。硯龍斂鱗春睡永。不妨水墨寫幽蘭。

八月十三夜。與冷雲師北邨履卿。飲于欸乃詩窓。分韻得影字。亂雲罩月遮西嶺。忽奪海欄清美景。蓼花蘆穗沒秋潮。飛雨打人醉顏冷。愛惜玻璃三萬頃。滿眼變成黑闔境。一帆彷彿逆風行。鬼火漁篝昏無影。

甲戌初冬念八。謝雙清子見贈佳茗。

相思一夜梅花發。盧老一詩爭日月。千歲遺篇照眼新。天風吹雪撼華髮。今朝忽有故人來。滿袖碧雲玉露開。兩腋清風豈欺我。仙靈引我睡魂回。

五律（參題拾四首）

感遇。

東方君子國。經緯自昭昭。神嶽百靈會。皇城羣后朝。江山何秀美。人物奈蕭條。幽獨不能寢。閑愁似暗潮。

登覽堪懷古。老年心自傷。風塵只猖獗。天地一悲涼。茅屋連秋水。漁舟坐夕陽。江亭酒雖薄。痛飲瀉愁腸。

病腕毫無力。愁城酒奏動。輕芋來弄水。小閣坐看雲。瘦菊秋將盡。殘楓日易曛。哀哀天外雁。千里恨離羣。

淒淒秋氣至。百感夢中生。淪落故人少。依稀殘燭明。荒庭無月色。破壁有蟲聲。永夜唯懷古。孤襟涕淚橫。

健友一藤杖。意行野水邊。風林秋雨歇。雲澗暮虹懸。秋稻千村碧。葛衣九月天。優遊無責者。猶自祝豐年。

寂寞無人訪。呼筇試獨行。天遙雲氣老。秋冷暮江清。溪閣梵鐘罷。浦漁烟笛鳴。孤蓬是何客。細火出蘆明。



白首煙波上。思詩倚小樓。蕭蕭秋葉落。滾滾暮潮流。壯志猶憂國。幽襟徒屬鷗。平生纔得意。明月在孤舟。

無絃向誰弄。靜默代琴聲。披卷照秋水。推窗見晚晴。歸雲孤嶂立。驟雨一林橫。明晦江邊景。催吾詩句成。

居諸無待我。滄汨促人流。木落山容改。風高海氣秋。家惟留一劍。身輒坐孤舟。欲了釣竿興。暮潮送遠愁。

七十又加六。漁樵送暮年。晚楓臨水寺。曉笛坐烟船。塵事情長絕。海山身欲僂。老僧如慧遠。翰墨訂深緣。

秋夜。

秋夕伴猿鶴。來遊老樹林。天風生短髮。海月濯虛襟。灑氣沁山骨。溪聲瀉我琴。謫仙今邈矣。千古仰遺音。

癸酉十二月二日。拉虎藤兩孫。遊淺浦清白樓。

幼孫步方健。催我出柴門。數戶雜漁販。一溪傍橘園。霜風枯荻岸。烟鳥落楓村。

清白樓頭夕。欣然對玉樽。

小樓雖在市。不引世塵囂。紫葷烹霜味。銀鱗斫暮潮。賞心山一角。適意酒三蕉。

隔壁呼隣叟。笑談破寂寥。

春朝黃鳥嘯。秋夕綠樽盈。文物三都會。舟帆一日程。間遊忘憂地。盛宴不夜城。

酒閣何嫌陋。期成清白名。

七律 (拾壹題參拾七首)

舊藩主德川三位公。賜蠟石印章兩顆。其文曰萬古清風乾坤

正氣。恭賦紀恩。

白字朱章刻玉珉。青天使者問潛鱗。誠心誰負君臣敬。禮數公容爾汝親。萬古

清風思故國。一堂正氣及遺民。豈徒寒族子孫慶。餘惠煌煌照比隣。

感懷。

日照芙蓉湧玉蓮。祥雲佳氣海東天。維新邦國國千里。復古帝家家億年。互市

賈帆翻彩浪。殊方貢院簇春烟。扶桑自是真人域。不羨蓬萊杳渺僊。



劉郎夢破說荒雞。水自東流日自西。故國文章蹤已遠。先王禮樂價何低。人情畢竟愛隣醢。世態尋常厭老妻。理亂晦明終復始。循環不用卜端倪。豈管朱門設雀羅。敗垣壞壁掛青蘿。百年何日銷憂盡。八秩斯翁閱世多。官道烟塵埋玉劍。藩城風雨倒銅駝。清明天地皆歸古。誰唱離離禾黍歌。江頭落日半輪沈。幽獨遺臣澤畔吟。安逸大官花是命。太平公子酒爲心。殊邦文物舟車會。禁闕瑞光雲樹深。頃有郡村開小學。幼童稍習八方音。誰學輕佻趙武豪。遽裁胡服換軍袍。風旋荒逕吠虛犬。月落寒潭捉影猿。驕秦官民嗜麟醢。清明刑典割牛毛。流風遺俗捨如土。閑却神州億万刀。鐵橋鐵道奪神工。絕海鑿山天路通。當日廟謨方拓北。一時侯伯悉朝東。鶻吞縣稅唯趨酷。耳食士評何得公。花發烏啼春景好。依依去化自然中。閱歷不堪山澤癯。繁華文物憶先都。蜂情蝶思殫人在。寶劍神弓掃地無。千古氓黎登戶籍。滿朝侯伯委泥途。若令畫平寫今世。古聖誤看妖怪圖。異端凶箴日僂僂。不見士心安紫宸。入學頑童仰戎狄。登科進士侮賢人。綺紈

當路欺真鳳。楮幣生風馳假神。誰洗乾坤歸太古。紛紜總委史編塵。

王道式微何日振。桃花源上問迷津。青衫喜汝出山志。白首慚吾失路人。江柳纔含新雨色。世情不似舊時春。窮途阮藉臨風淚。美殺莊周夢未真。

高陵深谷不歎遷。皇道清明復古天。一國生靈新雨靈。千秋花木舊山川。吾心只合盡王事。此手何曾負物權。碌碌頽齡猶在世。傍人呼作是頑僂。

七旬還見六年加。兩眼昏昏雙脚癩。海內故人頻問訊。山中陋屋足烟霞。三蕉量少能親酒。半畝庭荒亦養花。老大癡情聊自賀。小孫五歲學塗鴉。

清簾一片捨如忘。舉世皆趨名利塲。開化京官新禮樂。疎狂山叟舊文章。歲寒老柏表奇節。雪滿早梅生暗香。俯仰自思千古事。吾安吾道是勤王。

秋半。

故城秋半黍離離。世運維新陵谷移。雄志空違爭亂際。殘年幸遇太平時。荒原弓影芻人立。遺廟風聲石馬悲。欲寫國情追老杜。蓮峯野客百篇詩。

江南有客抱深憂。茅屋蕭然春又秋。園柳庭花風輒妬。朝雲暮雨夢猶愁。鬼神



何意澗泉逝。天地至仁民物稠。底死思君少陵筆。公評千古附悠悠。  
老骨又逢秋半天。愁中閱世奈流年。園丁俸比一家產。斗米價登千孔錢。布教  
法官無實力。救時楮幣有真權。自憐鶴髮與雲白。欲學赤松黃石仙。  
窮達由來皆屬天。功名富貴幾人全。閑居有樂坐歸佛。壯志無功去學仙。長物  
猶存袖中劍。高情欲託壁間絃。自哂方寸未消熱。又讀留侯圯上篇。  
衆口徒譚五大州。關河未見建鴻猷。好修社稷脫危地。誰使黎民投逆流。富嶽  
霞鮮雪融日。琵琶湖風碧月明秋。野人眺望淚霑臆。潮打空城送暗愁。  
菊池之水有淵源。華胄悠悠及遠孫。誰使金甌光易滅。鑿來渾沌命難存。五胡  
獸跡歸邪枉。一代民心失厚敦。獨往高歌採芝曲。殘年徒臥白雲村。  
疎燈老帙自相親。只恨聖文終獲麟。淑氣將回猶雨雪。陽和未動又風塵。人情  
世態皆歸薄。柳綠花紅才見真。頭上青天長可樂。夢依陋巷一瓢春。  
短髮何禁霜雪侵。浮雲逝水故駸駸。地荒四海交征利。天老五星偏重金。上古  
網維皆滅裂。先王禮樂盡銷沈。殘年憔悴江頭客。落日西風淚滿襟。

海東秋湧萬家烟。趨利西人爭受塾。更始民心新日月。消沈霸跡舊山川。誰知  
蠻族鴻蒙境。得見神皇開闢天。北海從今無缺舌。穴居猶克學喬遷。

世故觀來涕淚多。桑田碧海幾風波。詩書一架老林下。交友十年歸澗阿。蠻雨  
戎煙侵境急。疎星片月奈愁何。秋宵強把江樓酒。聽盡隣筵小女歌。

還憐鶴髮滿頭催。櫟樹大年甘棄材。季世人心趨侈靡。深秋景物屬悲哀。商飈  
卷地紅楓盡。霜氣連天白雁來。節後荒園幾叢菊。酌寒香冷委蒼苔。

平生事業恥虛聞。一卷詩篇貽于孫。清世優恩新士族。忠臣遺孽舊將門。霽雲  
朗月拜神岳。白日青天仰至尊。七十餘年湖海老。曠居安宅迓晨昏。

送津田大參事之東京。辛未春稿。癸酉秋修辭。

和風遲日客心寬。重譯相逢萬國歡。洛浦花光搖佩玉。官橋柳色映雕鞍。函山  
雨歇躡雲度。海道塵收探勝看。百五長程春正好。一新寰宇入平安。

呈紀教正。

文省清官拜玉簪。今朝南郡使車臨。天連鯨海波濤豁。地接熊山松柏深。千歲



家傳神聖道。一時教入庶民心。當期開化遍流俗。世上再開虞帝琴。

癸酉秋晚。寄霞峰。

荒園已送菊花天。誰向吟壇續古絃。久廢獵場追雉興。頃歸靈境拜香緣。世情  
閱去身先老。仙籙披來道未圓。欲倚南樓慰秋思。孤鴻斷鴈沒長烟。

寄大槻磐溪。

壯游猶記墨沱詩。頭上香雲映玉卮。鼎鼎年光遺我去。滔滔流俗倩誰醫。萬鍾  
何及三杯酒。百事皆空一局碁。浪蕊浮花看爛漫。知君春服咏歸時。

甲戌秋晚。遊水天一色樓。與遠藤子畏賦。

倏忽居諸不少留。百年鼎鼎去如流。風聲白露蘆花瘦。星影疎煙雁語愁。天地  
無情人自老。江山使我作斯遊。欲將眺覽開胸臆。來倚水天一色樓。  
新築高樓淺浦湄。水天一色望愈奇。同襟有客餞秋語。橫笛誰家向月吹。漁火  
紅微雲鎖處。紙窓青濕汐旋時。陽侯畢竟非無意。欲爲斯翁洗惡詩。  
海上傳聞奈暗愁。暢然一醉與君謀。世衰鸞鶴和烟遠。松老龍蛇捲浪流。明媚

半江看欲暮。蕭條二客坐傷秋。文章縱少坡仙筆。乘興將追月下舟。

弊船形勢一年年。士庶滔滔說貨泉。未聽樞機出真宰。或疑簧舌弄公權。千重  
蟻垤山圍郭。九萬鵬程水接天。聞道諸公知勝算。火輪高度紫冥煙。

雲帆沙鳥影相追。西海殘陽欲沒時。淡泊交情徒守樸。澆漓世態競趨奇。三蕉  
已學蘇翁酒。五字未能陶令詩。迂拙豈堪當路事。莫言閑客卷懷之。

採葦。

茅屋棲荒野。水陰。秋來白髮轉蕭岑。猶餘名勝幽探具。欲償平生閑適心。約束  
兒童穿竹徑。呼催隣曲借松林。傍人莫問葦多少。半日清遊歡樂深。

乙亥春日。

田家迎歲氣清新。雪後晴光動碧旻。天錫今登朝士籍。仙風高導水雲人。盃湛  
家釀盈盈色。窓對梅花樹樹春。一路芳山非遠隔。丹心欲掃古陵塵。

乙亥秋日。族人霞峯子靖齋見贈古式烏帽。精好簡潔。上世朴

淳可想乃走筆言謝。



寂寂寥寥一草亭。烏巾好讀太玄經。深山曆日推花木。上世民情見典型。愧我老顛頭既白。欣君遠信眼常青。壁間且揭霞翁畫。風卷湘雲竹露馨。

五絕（貳拾參題八拾七首）

癸酉早春。

東皇政化洽。遠人來若期。春色三千里。鶯花恐後時。  
高松一百尺。老鶴五千年。此地蓬萊是。日昇東海天。  
梅亦知年改。今朝幾朶開。神仙仁壽域。日本是蓬萊。  
白沙春水滿。海寺夕陽明。萬象來胸臆。是吾咏歸情。

感遇。

六籍委泥土。橫文滿里閭。預知千歲後。必有壁中書。  
巧言毀典型。互市雜臆腥。流出黃金盡。人間紙有靈。  
獨立蒼江上。始覺天地寬。悠悠昔人迹。心期一釣竿。  
落日孤峯遠。渺茫皆水煙。大江風未起。暝色一帆懸。

月黑村墟夜。螢火照人飛。陰霖久不歇。腐草生光輝。  
深宵觀世運。心緒亂如麻。幽人默不語。四壁蟲聲多。  
汪洋綠水遠。搖曳白雲閑。松柏三千樹。是吾埋骨山。

讀近世詩。

青年北地骨。老大劍南姿。不愧古人者。我推筑水詩。  
樵翁芋綿筆。天授一家奇。斷句君莫說。本事不在詩。  
櫻老五千首。排陳纈祭編。落花三十律。警句壓明賢。  
萬象歸秋水。片心依暮雲。金帝斯雨句。浣花有餘芬。  
鳴于一百首。粉香和麝煤。日東竹枝響。正自島郎開。  
吾忻摩島子。風流與道存。浩然千古氣。不愧老儒言。  
天地燮理變。斷腸又斷腸。後世誰不讀。松南米貴行。  
長篇數千言。短句二十字。品評白翁詩。神韻是能事。  
怒張海濤立。流麗春雲行。詩情無痕跡。天籟自成聲。



水月生青眼。僂風吹白衣。步虛冷然善。此妙人不知。

（白谷）

凝神入鬼削。彫鏤奪天工。後生可師者。我推星巖翁。

（星巖）

滿身憂國血。一瀉作詩篇。吟骨生苔後。天恩抵九泉。

（星巖）

曲折從流水。卷舒出岫雲。七言長短句。扶桑獨有君。

（星巖）

梅墩如巨海。才大不爭奇。圓熟鑄生硬。七言八句詩。

（旭莊）

一題唯一詩。破的在神變。虎豹皆應弦。譬如飲羽箭。

（旭莊）

霜劍新發剛。錯節竹迎刃。多多君益能。詩壇老韓信。

（旭莊）

論詩示仲幹。

六籍日當讀。詩唯期正聲。古人溫厚語。總是出精誠。

生吞擬老杜。粗率視青蓮。鸞鶴去無跡。後生眼若煙。

石鼓又山石。堂堂見雄姿。揮霍典型在。莫作女郎詩。

王孟又韋柳。沈靜如湍水。景慕汝宜學。詩中四君子。

高岑二天授。噓噏生靈風。大成杜工部。慈恩一遊同。

浴日巨海湧。涵星長江流。偉哉蘇玉局。神彩照千秋。

曉起觀蓮。

曉禽聲憂憂。殘月在林柯。爽氣心如洗。來觀君子花。

題玉溪墨蘭。

天招楚人魄。化成清絕姿。秋風如有意。莫向世間吹。

一自騷經出。千秋說國香。寂寞秦關月。無人弔懷王。

幽蘭生巖下。遐想屈子吟。古人不可見。千歲湘水深。

俗醫無還丹。仙凡換骨難。讀書萬卷後。可以畫斯蘭。

癸酉八月。拉孫仲幹。遊宮原吉田氏戩穀堂。仲幹畫成。因題。

幹乎善寫山。筆下有千山。誰家傳粉本。是我詩中山。

秋晚。與紀教正及中山岩橋中島下條諸子。過應神詞外廢寺。

入眼楓林明。刺肌霜氣銳。古寺殘僧無。林霏佛殿閉。

散髮烏藤筇。意行入暮景。不向江潭遊。爲慚水中影。



與遠藤芳川遊北澗。

天籟生我口。高吟破山雲。毫端鬼哭字。不作蟹行文。  
來者不可待。白髮玄無由。北澗一川水。兩流逝不休。  
欲歸復駐杖。彷徨綠水間。此遊非難得。不忍別碧山。

送伊達自得翁遊熊野。

相逢意堪愧。世累身未閑。只有幽夜夢。送君入青山。

送別成瀨邦輔遊東京。

共遇清明世。青雲仰帝京。男兒重意氣。不作斷腸聲。

由良義溪遊西洋諸國還。

一劍四方志。欲窮大海寰。下邦不可駐。直向日邊還。

送盤谷老師歸金峰山。

朝出白雲去。暮入白雲歸。白雲看不盡。白雲染禪衣。

諏訪社競馬。

日照赤陣動。風飄黑龍飛。何時驅此輩。直殲西戎歸。

九月十五日遊南溪。女保孫武恒武貞族人。晉米太治江戶鋪

彥米嘉平長七貞橘莊二僕喜平橘造婢波矢啓小梅竹野高

房醫前山元璋厨人岡武擔夫德從焉。小詩記閑適。

溪山六五里。閑適世情空。犬吠白雲外。人在白雲中。

不見塵世事。樵歌隔水幽。我亦餐霞者。來與遊雲遊。

遠入秋林去。健友杖一枝。有詩休題石。恐有世人知。

獨往溪南路。搖曳孤雲閑。胸襟唯白石。知己有青山。

田家秋後菊。晚節立殘暉。欲折一枝去。幽香滿我衣。

採葦淺浦女。笑語過石缸。恐妨彼行樂。携琴入別峯。

白雲帶紅樹。緝我胸中天。優遊無塵累。地行一小仙。

山深人籟絕。石峙水淙然。撫琴欲復寫。我家幽澗泉。

青山明我眼。清泉洗我心。彈琴未終曲。白雲來滿琴。



行樂未言歸。暮鐘發深省。已厭杯肴煩。石鼎茗烟靜。  
數星漁火小。烟合夜山遙。時看人影動。素月上寒潮。  
輕隊不知夜。行歌及竹扉。月明林影白。棲鶴待吾歸。

十月初二夜。携孫仲幹。上補陀洛山。徹曉觀月。

欲洗煩塵熱。來叩道人家。月輝若明水。松影踏龍蛇。  
秋夜訪老禪。橫琴松下石。談熟夜已闌。霜氣海天白。  
藥王小閣鎖。萬象寂無聲。蒼茫水烟裡。一帆受月行。  
風露秋山冷。蟲音益感傷。夜闌不忍去。枯坐先塋傍。  
殘雨斂遙岑。片雲迷出處。此語長可傳。斯人今何去。  
小集詩思密。郊寒苦無聲。霜鐘擣人定。曉郭細火明。  
玉帝徵詞客。美星改乾坤。曉宴有盛饌。百里鎔銀盆。  
妙法已不唱。秘咒亦不依。一篇青蓮偈。徹夜供白衣。  
曉倚西欄望。月傾海氣澄。波濤蕩胸臆。晶徹萬頃冰。

碧月磨爲鏡。白雲裁作衣。不引人間熱。神遊入紫微。

十月初四夜。携孫玉溪池柳潭。觀月於品樂鷹城間。遂投啓明

樓。舊曆八月十七夜也。

蟲聲草際路。風露二更初。澄潭月照石。臨水數遊魚。  
夜色若無情。山雲一望橫。嫦娥不負我。又送三更明。

啓明樓。以山高月小。水落石出爲韻。與孫武貞賦。

江亭今夜景。詩在黯澹間。亂雲屢遮月。雨氣欲沈山。  
海風吹月來。松翠卷寒濤。天地皆澄澈。霜華河漢高。  
貧景坐旗亭。微酌養吟骨。蹒跚孤竹筇。徐步松林月。  
客枕不成眠。起看秋江曉。信宿蘆間舟。燈火出篷小。  
荒村秔稻雲。古驛魚蝦市。萬象夜無聲。遙聞石瀨水。  
苦吟與影親。枯坐延幽酌。澎湃驚沙鷗。寒潮夜半落。  
踏月步松林。身胸皆一碧。欲試幽澗泉。接琴潭上石。



江亭秋未闌。雨近江雲密。風自柳堤流。殘螢三四出。

市川霞洞所藏介石山水小粉本。

豈啻卅三身。一身即萬身。遊戲神通力。一一現天身。

藥名。

山藥外愈晦。水沈內自香。遠志與誰語。忘憂吾更傷。

先妣墓下作。

低徊墓道側。松柏唯寒霏。白首老萊子。秋風泣彩衣。

冬夜。

孫也皆耽學。圍爐夜半談。青燭有白酒。下物劈黃柑。

乙亥重陽。

天子錫士命。何必上雲臺。今日重陽酒。白銀菊花杯。

伯孫謹慎性。家道卜後榮。仲也詩進步。唱和慰老情。

七絕（五十貳題壹百四首）

癸酉三月。西京御苑。許庶民拜觀。

四海昌平歸一家。洛城春色綺羅霞。吾皇德澤涵天地。士庶均觀上苑花。

和歌浦。

衣冠文物舉歸東。遺俗流風掃地空。猶有居民思舊澤。一叢鼓笛祭源公。  
觸目蕭條皆黍離。郊原風露冷吟髭。照公遺廟無人邦。月暗松杉鬼語悲。  
照公遺廟委寒濤。水鬼江神皆泣號。雨濺空山丹碧落。雲封松柏石壇高。  
名草山前望轉迷。兼葭漠漠海雲低。養珠寺廢無燈影。夜半西風石馬嘶。  
花落津頭神女宮。石欄人影夕陽空。千年陳跡簪纓盡。鷗鷺夢驚蘆荻風。  
世運全歸那縣秋。不知何物試權謀。金城鐵壁今無用。現出紅燈綠酒樓。

癸酉八月。輓久野玉城。

葛城山對碧欄干。坐客賢豪詩酒闌。憶起隣霞樓上宴。一天秋色月輝寒。  
千古傷心弱浦秋。浮雲流水去悠悠。風清月白長堪憶。名草山前咏鶴樓。  
虛襟君自忘權家。古道親交無以加。君唱我酬詩似玉。西行庵裡賦梅花。



南山橘子歌。

東南百里海潮通。箇箇舟帆逐曉風。山嶽鎮收黃橘利。無人不道仰龍公。  
頓足悲號寢廟傍。十年搜索飽冰霜。已看遺愛遍天下。誰摘新柑獻古皇。  
子規聲裡散幽香。妍月朧朧帶草堂。誰識三秋霜露色。染成金橘滿山黃。  
江南十月曉霜晴。樹上長庚一點明。數里村塘人陸續。上番金橘始輸城。  
白露滿山霜滿天。津亭曉笛破江煙。數帆相逐來投碇。箇是三薇買橘船。  
古碧樓頭望海天。豫山讚嶂淡於烟。孤帆先度杳冥色。知是黃柑第一船。  
金橘摘來千萬箱。園丁辛苦踏晨霜。都人不問山家事。枉供紅樓解醉湯。  
滿郡黃柑帶秋露。幾船香玉吐輕霧。篙師先向主翁謀。所指浪華將武庫。  
百里江南橘柚鄉。滿山霜色曉雲黃。美人銀燭金盤上。劈得玉纖噴霧香。  
龍公遺愛故悲傷。採採無人貢玉堂。十里錦雲安諦郡。滿山橘柚爲誰香。

癸酉小春。綾鄉與其妹歌歸浪花。明日有雨。

江頭歸客買舟行。江雨欲晴猶未晴。名草山前風浪惡。不知何日到津城。

海氣空濛雨氣深。歸橈應滯紀川潭。中宵姊妹擁衾語。一點燈光兩地心。  
暗雲如墨旅魂驚。明滅青燐水鬼聲。殘夜潮來風正轉。行帆直指浪花城。

別後簡綾卿。

孤舟載病出山陰。山閣猶留一古琴。歸在當年歌吹界。應知山水有清音。  
浪華城外晚風愁。漠漠江雲望似秋。飄泊拾遺曾自道。天涯老病有孤舟。  
白首瓢零人必驚。青春歌舞入時評。高津祠畔石燈柱。存否當年記藝名。  
休嘆烏兔去無聲。白首蹉跎送此生。賣劍鬻家猶未給。愧卿憔悴客津城。  
白石清泉未了緣。翠禽憂憂夢如烟。羅浮山下不歸去。人與梅花瘦欲僂。

東京春詞。

太平諸吏百無憂。大道春風調紫騮。日上宮門猶未闢。尹公終夜在紅樓。  
釵影粉香雲滿街。溫柔鄉裡托生涯。依依家是柳橋柳。飛絮隨風上玉階。

兩都懷古。

寺寺鐘聲落晚霞。東山妍媚似仙娃。春風吹老黃金色。十萬人家種菜花。



(西京)

霸蹟荒涼三百秋。吾來弔古奈悠悠。功名富貴今安在。河水縱橫繞郭流。

(浪華)

近世名士評。

西學將傾政教權。先王禮樂趁荒煙。熊翁慧眼明如火。豫見煌煌二百年。

(熊澤伯繼)

弗許韓臣清色旗。當年白石執權時。一篇採覽夷言在。此意後人都不知。

(新井君美)

冤恨終伸九地間。清明天子鳳章頒。莫言遺著多迂議。縱抵孫吳亦等閑。

(林子平)

此老渾身是赤心。當手誰復問幽襟。遺編一部山陵志。應識清明有即今。

(蒲生君平)

丹血微言重鼎銘。山河猶未澆膾腥。當時若用停銅策。今日何看紙有靈。

(龜井道載)

外史一編天下傳。知君筆力執文權。三郎致死繼先志。義烈能振復古前。

(賴子成)

梁老詩追杜老才。一生悲憤海塵來。清譽鎮在千秋後。赫赫明文照夜臺。

(梁公園)

賀由良義溪歸朝。

一片雲帆入港初。歸鞍先見到吾廬。可知意氣橫滄海。三得歐洲萬里書。

萬里功名在汗青。遊蹤何必陋羶腥。段來一事向人說。頭上高看南極星。

蠻雨戎風瘴癘深。此行艱苦最難禁。奇門今日喜無恙。一片誠忠報國心。

瀨見善水應徵上京。乃賦送其行。

故人今日拜朝衣。從古深恩衆所歸。臨別一言君請聽。玉堂慎莫說韓非。

示野田良貞。時朝廷有徵。余以病辭之。

寒家十世士農間。此老身間跡亦間。却笑壯心猶未老。更携朝士入青山。



紅樹白雲秋色闌。半江微雨短簑寒。君臻輦下見朝士。莫道待清垂釣竿。

送良貞東行。

官途局促不徭晴。匹馬今朝衝雨行。魚雁往來須用意。莫違黃髮倚門情。

聞草野政信辭職。

聞君辭職日優游。憶否江南煙水秋。十里蘆花風正老。一竿長待夕陽舟。

花園教正見惠古梅墨。乃賦謝。

封事曾聞韓退之。籃關風雪禍何奇。清明今日君無用。閑寫陶翁古淡詩。

酬花園教正見示國歌。

黃茅屋老白雲鄉。十里蒹葭澹夕陽。一夜秋江桂花月。天風吹落玉階香。  
願問慇懃及老漁。瑤音遠遠水雲居。辛逢天地清明日。何事區區袖裏書。  
草際微蟲秋自啼。西風白露共淒淒。九天高挂清虛月。六道精靈夜不迷。

長洲將去。芳川來。長洲熊野人。芳川若府人。

澗水浮花日易曛。仙源未免物情紛。南人惜別北人至。太似青山來去雲。

送平山長洲歸和歌山。

花落江村夏木新。仙源無路奈迷津。老來最是銷心事。杜宇聲中送故人。

簡浪花春聲樓主人。

往事茫茫散作煙。身參海上白衣仙。梅花柳色今何似。不到津城既五年。  
杯凸牛酥盤宰豚。青蛾當酒解夷言。不知千百淀南柳。昔日風流幾樹存。

西京田中素心來賣藤田東湖書。余換以賴山陽書。戲賦。

幾歲神交共草萊。今朝送別酒三杯。幽居未必嘆蕭索。一友辭時一友來。

淺浦歸途。戲做甌北。

鳴門日落鰐魚驕。雨脚騎雲逐暮潮。篝火熒熒人語遠。歸舟維在第三橋。  
天公何意久慳晴。一路深泥不可行。小傘直衝林雨過。自家頭上敗荷聲。

癸酉中元。宮禁村民躑歌。

聖朝新令遍乾坤。清肅山城及海村。放笛無聲蟲唧唧。金風玉露作中元。

聞神山鳳陽獲古劍。遙寄。



豪士腰間日本刀。千山風雨夜悲號。神龍一躍誰知得。飛向胡天翻血濤。

秋日遊吉川園。戲做楊誠齋。

一枝筇竹一奚丁。乞火吹烟倚野亭。九月南中雨未下。離離柳實尚深青。

九月十三夜。

群山雨霽月華新。世界空明不見塵。自是寬平宸賞意。千年松柏挂銀輪。

秋興。

江南漁客水雲居。箬笠蓑衣世故疏。蘆荻葉青秋未老。半灣潮候憶鱸魚。  
晚菊傷風色似灰。殘荷委水碧盤摧。高情獨有桂花在。月未清輝不肯開。  
晚秋猶適葛衣涼。夜熱何堪弄酒觴。蟲語滿園無月色。桂花纔送暗中香。  
雨色依微氣似春。晚晴尤適白紗巾。荒園未見黃花色。節過重陽已二旬。  
秋江杳渺日將曛。獨倚危樓看辭雲。捲地西風來不已。蘆花楓葉共紛紛。  
疎籬曝網老漁家。幾樹霜楓媚晚霞。江上深秋好風日。赤蜻蜓立白蘆花。

癸酉十一月初四。舊曆九月十五夜。月食。

瑤臺銀閣厄何奇。月裡老螭來食時。一稔寒燈千歲恨。杜臆徒讀玉川詩。

淺浦歌。示橋本射山。

千間釀戶醬如酒。半浦漁蠻舟作家。別有紅粧引遊客。新聲唱起竹枝歌。  
戶戶春風多賣酒。樓樓夜雨頃移花。有魚潑瀨女能舞。誇道南中小浪華。

舊曆重九書懷。

白酒黃花昨夢非。西風捲地海雲飛。古人此日登高賦。謾道文章落布衣。

十月三日夜歸。

路入溪間踏影行。林柯霜白宿禽鳥。誰知十月初三夜。還作黃泥坡上明。

即事。

忽聞驚浪走沙聲。雲奪南山失晚晴。三徑未開黃菊色。縱他風雨至天明。

遊金谷。宿橋伯明家。

寒鴉棲定月昇初。小隊來投水上居。何怪晚餐後稍久。半溪漁火網香魚。

夢下不二川。夢中得此詩。



芙蓉峰上月明秋。百里奔川一葉舟。孤客思君君不見。將同太白下渝州。

登藤白峰。

呼起壁間雙鐵龍。征衣拂露踏晨鐘。天風吹髮冷然善。身立熊山第一峰。

穠花亭上。賦示諸子。

沙堤十里步殘陽。楓樹紅稀梅未芳。肅殺風光天地老。一枝野菊亦無香。

施無畏寺觀月。與孫玉溪。分江上清風山間明月爲韻。得江上明。

十里秋潮沒斷缸。飛欄浸影似船牕。雄吟工部無他語。道得清輝流大江。  
祐公有約訂清賞。幸喜今宵天宇朗。露坐思詩不避寒。貪看大月抱松上。  
玉露金風夜轉清。纖塵不動海天晴。今宵來踐前宵約。償得三秋一夜明。

題小賀安諦雄秧雲窓。

千頃秧田青漾漾。連山缺處日初上。幽人早起推窓看。裡有蒼生腹鼓象。  
仲冬與孫武貞遊箕嶋。宿立神社中山氏。

數里橫塘踏夕陽。老松脩竹認高堂。水開仙客清虛意。山照詩人錦繡腸。  
作詩孫有謝生同。三日閑遊世慮空。瘦杖更延餘興健。今朝衝雨見丹楓。

簡三溪。

衰翁日夜望皇京。洛社寥寥久絕聲。天籟未與人籟寂。東山曉翠見長庚。

題千川氏存古書院。

真烈會蒙賞典榮。賢郎至孝出天誠。一門淑穆皆兄弟。不負高堂存古名。

贈劍於霞峰。

琴劍悲悠歲月深。劍今飛去獨留琴。寒光一片君看取。與國以來傳世心。

觀亡友霞峯青嶂詩畫。

青老畫梅霞老詩。清魂相見想瓊姿。爲君痛哭爲君賀。不值西風搖落時。

曉赴淺浦途中。

漁火殘星水寺鐘。連山一抹曉煙濃。啓明始上東方碧。認得天邊白馬峯。  
松上長庚一點明。秋霖纔齊澗雲橫。梧桐葉破微風動。猶聽中宵殘滴聲。



施無畏寺即事。

十日淫霖倒怒濤。滿山猿鶴只悲號。今朝來上大悲閣。山遠水明秋氣高。  
歸艇相追帆路斜。數聲烟笛夕陽家。一雙白鷺忽驚起。繚辭半江蘆荻花。

採蕈歌。

輕裝小隊趁朝烟。白首青童相後先。數里松林聞笑語。人間又見採芝仙。

香巖集題詞。

宜爲天家贊廟謨。不須隱迹學狂愚。清明猶有風雲警。未必閑舟遊五湖。

乙亥二月初五。得恒貞兩孫東京信。紀喜却寄。

驛吏朝敲水石居。靜聽紅旭欲昇初。梅花昨夜東風信。喜見新年第二信。  
汝客江頭我守家。啼鶯何日度春霞。嚴城風雪三冬苦。成就人間第一花。

四月廿四日。至葭川途中。

微風小暖一裘輕。數里村塘踏晚晴。四月南州春未老。女兒爭採紫雲英。  
九月晦。與平山長洲。飲于古碧樓。

樓外紅楓映酒卮。翠蛾當酒解吟詩。紙窓倒動漣漪影。正是潮來日落時。

十二月初五。淺浦舟中。

蘆荻洲邊汐退初。一竿乘興伴隣漁。篷間袖手默無語。意在釣詩何在魚。

風船。

窺理能傾違化權。機工今日挾飛仙。空中有物大如葉。仰見風船度碧天。  
自然靈妙別坤乾。日月麗天魚躍淵。堪笑西戎窺理學。成功未必勝風鳶。

偶感。

遙蠻遠狄豈師表。赫赫神州何自小。誰探謳歌奏玉階。金籠枉養能言鳥。  
江山絕似斷絃琴。空憶虞韶和樂音。法律能成秦漢治。古來難得是人心。  
舉世陶然惟有沁。功名何必期身後。雲來雲去亦無心。一片青山是吾友。



海莊菊池先生遺稿 終

昭和五年五月二十日印刷  
昭和五年五月廿四日發行

著 者

和歌山縣和歌山市大泉寺町五番地  
貴 志 康 親

發 行 者

和歌山縣有田郡田栖川村  
菊池海莊先生建碑會

印 刷 者

和歌山縣和歌山市久保町一丁目二十六番地  
爲 森 八 重

印 刷 所

和歌山縣和歌山市久保町一丁目二十六番地  
爲 森 商 店 印 刷 部



330  
21



終

